

釋淨空敬題



梵網經直解

佛陀教育基金會 敬印

梵網經直解弁言



言炎炎非夸。理空空不頑。達人信之餘。則大笑焉。人生以四大偶聚之身生。未經禍亂。不識存亡輪報之因。不發心地光明之藏。不釋

諸佛菩薩修證之書。不逢大善知識登壇開示宗義。信者不槩見。而笑者接踵。固其所也。今天下荼苦箴以加矣。流寇擾戮中

原芟刈人命如草菅然。揆所元來。豈不緣
 信者之乏人。而笑者之弘多乎。往見名山
 大刹中。高置猊座。登演三車。伐大鏞。樹寶
 幢。侍從儀仗。鵠立左右。儼然如古王者禮。
 祇承明訓。竦聽伏息。此其與功令之畫一。
 將毋同然。卒不見浮提之人。屠刀釋而見
 性。石額點而傳燈。豈有異故。則亦解法者
 之未繩乎法。度世者之未違自度也。余年

p.c

來薦歷兵戎。數經憂患。兵燹之慘。觸目痛
 心。念此火坑灰劫。何繇以甘露楊枝灑之。
 立躋清涼乎。會戊寅秋。三昧大師。廣集大
 眾。說戒長干。現智身於華藏。騰應質於娑
 婆。於時浮屠九級。放大光明。香靄薰空。梵
 音動地。都人皈依投體者以萬數。薦紳先
 生暨諸文人名士。質疑護法以百千數。而
 余爰得拜於風下。西來大意拈示娓娓。隨

p.c

叩洪鐘。耳聾卻走嗣。是千華室結。四眾雲
來。卽素有非笑我法。咸相顧咋舌。無敢出
聲。余以是信師之能以自度者度人。慈航
寶筏具在是矣。昔大雄氏爲一切眾生開
心地道。或頓或漸。罔不基命於戒定慧。今
使人人立愛惟親。消除殺孽。玄夷脫劍。黃
巾賣刀。菩提樹下。珠光燄燄無生。本來各
有安放佛心地。黑風鬼國。悉是清淨大千。

4

安見此五十八戒中。固不已合天人眼而
並觀。齊大小乘而一致歟。吾師金策所駐。
闡法繁殷。以夙所釋梵網經。簡閱推詳。宣
揚妙義。字櫛句比。不牽枝葉。顏曰直解。爲
信之者廣長舌也。若夫金剛寶藏。性地圓
明。妙戒法門。修證源本。亦無所庸解矣。
崇禎庚辰春王穀旦之吉

河間范景文敬撰

5

大寶華山
慧居寺

進大寶華山三代律師著述奏章

大寶華山慧居寺臣僧福聚謹

奏為恭懇

天恩收錄末學事臣僧山野庸愚仰承

皇上宣暢律宗誠千載罕遇之奇緣使歷代佛祖增

輝億萬緇流戴德由是臣僧念本山第一代臣

僧寂光著有梵網直解四卷二代臣僧讀體著

有毗尼止持十六卷毗尼作持十五卷三壇正

範四卷三代臣僧德基著有毗尼關要十六卷

誠乃戒律之楷模可為苾芻之綱領今蒙

聖恩重修大藏敬將三代著述上懇

天慈收錄末學編入大藏續如來之慧命作後學之

津梁臣僧福聚躬闡

殊恩不勝感格之至謹

奏

雍正十二年五月初二日

上命莊親王同超善自塏等將此書校閱明白編入

大藏

本月十七日

上問莊親王止持五部等書入藏之事

莊親王覆

奏臣同超善自塏商議華山三代所著戒律堪為

入藏但此內或有刪去者酌量刪去明白奏請

入藏於本日奉

上諭若有刪改者著令福聚帶往回南刪改明白送

到之日請旨入藏欽此

乾隆元年十二月十八日啟

和碩莊親王

和碩和親王

寶華山住持僧福聚謹

啟為恭懇

慈恩轉達

天聽事福聚山野庸愚恭逢

聖世宣暢律宗重修大藏於雍正十二年五月初二

日在京請將華山律宗五部收錄入藏欽奉

世宗憲皇帝俞旨將此書著令福聚帶回南去刪改明

白俟送到之日請旨入藏欽此欽遵福聚還山焚香

恭禱佛前敬述

聖恩詳閱梵網直解四卷毗尼止持十六卷毗尼作持

十五卷毗尼關要十六卷咸屬戒行之楷模僧

人之律典解釋詳明毋庸增註條分縷細無可

減刪福聚愚昧實不能增損一字惟三壇正範

四卷乃闡揚作持部內未盡精微存之雖似涉

冗繁刪之則作持部內又少發明恐後學難於

領會福聚回南之時曾將此書留存一分於藏

經館今應否將三壇正範四卷刪除抑或並存

伏候

欽定福聚恭逢

天降佛緣廣敷善願率土僧歸戒律敬懇

慈恩轉呈

天聽一併編入大藏永垂萬世伏乞

王爺恩賜轉

奏謹

啟

總理藏經館事務臣 允祿弘書謹

奏為請

旨事據寶華山僧人福聚稟稱雍正十二年五月初

一日在京請將華山律宗五部收錄入藏欽奉

世宗憲皇帝俞旨將此書著令福聚帶回南去刪改明

白俟送到之日請旨入藏欽此欽遵福聚還山詳閱

梵網直解四卷毗尼止持十六卷毗尼作持十

五卷毗尼關要十六卷咸屬戒行之楷模僧人

之律典解釋詳明毋庸刪減但三壇正範四卷

乃闡揚作持部內未盡之意今應否刪除仰或
一併賜入大藏等語臣等令僧人超盛等詳加
查看得三壇正範四卷其受戒儀軌與作持部
內實屬重複等語查三壇正範既與作持部內
重複應行刪去謹將華山律部五種一併恭呈

御覽伏候

欽定爲此謹

奏請

旨

乾隆二年正月二十六日交奏事太監王常貴
等轉

奏於本月二十八日奉

旨照所奏入藏欽此

於乾隆三年十二月十五日大藏工竣

乾隆四年六月二十六日欽奉

聖旨頒發藏經於乾隆五年五月初七日江甯織造


臣韓四格專誠齋送

龍藏一部計七千二百四十五卷到寺臣僧福聚欽

才系系一角云	八
遵供奉望	
關謝恩今將 ^臣 僧所進本山三代律祖著述七函欽	
依	
頒奉卷次敬謹編刊方策板存寶華律社用廣流通	
以此	
功德恭爲	
今上皇帝祝延	
聖壽無疆仰願	
皇圖鞏固	

帝道遐昌	
聖日與佛日長明	
金輪同法輪齊轉	
乾隆五年八月十三日司律寶華第七世	
欽命傳戒	
賜紫沙門慧居寺住持 ^臣 僧福聚恭紀	

欽定龍藏梵網直解卷帙字號標目



勞字號一之十

卷一

上之一

弁言至故云不共

卷二

三華光請釋至更廣說之

卷三

二明十行義至

卷四至五字號標目

上之二

故云深深心解脫也

卷四

四達心位至二文所說

卷五

四體性爾燄地至無二相矣

卷六

下之一

二明心地戒至詞旨切矣

卷六至七字號標目

十

卷七

三正結戒品至可不慎歟

卷八

二說輕戒相至亦復如是

卷九

下之二

第二十一瞋打報仇戒至尙爲略也

卷十

第四十揀擇授戒戒至後跋

七司至三孕載四野三

二

持戒念佛

持戒不嚴決墮地獄餓鬼畜生尚難求

休妄想人天福報

定能證等覺妙法菩提


念佛若切便超極樂聲聞緣覺猶弗任

右恭錄慈舟大師座右銘 光永

本系系正角殊在形上

二

佛說梵網經直解上卷之一



姚秦三藏法師鳩摩羅什奉 詔譯

明廣陵傳戒後學沙門寂光 直解

菩薩心地品之上

○直解大意五 初釋經題目 二釋譯人名

三釋經品題 四明分科義 五正解經文

○初釋經題目

佛說梵網經。此一經之題也。得此數字標題即知如來出世說法之本懷。洞明全經之大旨矣。直解

七四四五五五五五五五五

經題。有總有別。總謂佛指說梵天宮中嚴飾身殿之網羅幢以喻心地法門之戒經。別釋有五。一明能說佛。二明所說義。三合明佛說。四指喻表法。五結歸其名。一明能說佛者。梵語佛陀華言覺者。謂覺身心大幻。究竟諸法性相故。覺有三義。一自覺。異凡夫。二覺他。異二乘。三覺滿。異菩薩。云何自覺。異凡夫。以凡夫墮煩惱網。我見為綱。為因。六根攬諸塵背梵行。趣五欲。縱三毒。輪六道等。眾目齊彰。不能自覺。惟如來從凡夫發心。本佛性戒。悟自性

五五五五五五五五五五

之真空。了惑業之虛妄。功成妙智。迴脫根塵。故異凡夫。云何覺他異二乘。以二乘愚無明網。空見爲綱。則厭生死。取涅槃。憎三界。惡四生。惟自寂遠。大心等。眾目齊彰。不能覺他。惟如來離色數量。證平等智。得法性空。運無緣慈。入魔佛界。廣化眾生。離苦得樂。故異二乘。云何覺滿異菩薩。以菩薩畱識情網。愛見爲綱。則起大悲。度眾生。歷五位。修萬行。破無明。分證理等。眾目齊彰。覺未能圓。惟如來心色俱離。根本智顯。五住盡。二死亡。三覺圓。萬德備。

在天爲天中天。在聖爲聖中聖。故異菩薩。號曰究竟覺了之佛。如來具足十號。今舉一號。則十號齊彰。此佛卽娑婆世界說法之教主也。二明所說義者。說者悅也。有自他之別。謂佛所證法。生佛平等。時以四辯應機而說。暢悅所懷。謂之自悅。眾生聞者。頓明佛性。得受佛戒。卽入佛位。心悅所聞。謂之他悅。故曰說者悅也。三合明佛說者。通論說法有五種人。謂佛菩薩。天。仙。化人。皆能說法。言佛說者。以心地戒法。乃覺皇金口親宣。非餘者能說。故又

法報。化佛皆能說法。此經屬何佛說。按義推之。乃
依法身根本智。起後得智。現報身為說法主。報身
化千釋迦。千百億釋迦為聽眾。舍那復敕千釋迦。
千百億釋迦於諸世界為說法主。人天凡夫等為
聽眾。其本佛迹佛隨地。隨時。隨機所說。傳無異詞。
唯一梵網法門。五十八戒。百千法門。皆此梵網之
眾目。是知三身應機有異。其體本同。此梵網經。乃
三身佛同說也。千臂經亦同此義。四指喻表法者。
經云。時佛觀諸大梵天王網羅幢。因為說無量世

界。猶如網孔。一世界。各各不同。別異無量。佛教
門亦復如是。梵網喻也。喻無量等法也。言大梵天
王宮中之網羅幢。名因陀羅網。唐言天赤珠。此網
有千重。而有千光。其光各各相攝。不相妨礙。繇此
天王。因中修梵行。果感梵天。寄位。因中修眾德。果
感梵網莊嚴。時佛於彼天說法。欲標題流布。一觀
此網光色重重。有似法門理事互攝之象。故以無
量網孔。喻無量世界。喻無量眾生心。喻無量佛教
門。喻無量菩薩差別階級。喻無量諸佛受用境界。

以此一喻。而攝多義。故從喻立題也。經文言世界
法門。正攝眾生心。若無一切心。何用一切法。擴而
推之。無量大小橫豎網孔。喻無量寬窄仰覆世界。
而無量世界。繇眾生無量心行所成。佛說無量大
小乘教門。無數賢聖差別階級。皆隨眾生心垢輕
重方便施設。如是四聖六凡。皆因緣所生之法。了
無實體。繇眾生不了自性。故勞一舍那千釋迦千
百億釋迦佛。出廣長舌。橫說豎說。塵說刹說。熾然
說。謂之心藏。地藏。戒藏。無量行願藏。因果佛性常

住藏。與奪橫施。皆本眾生心。不出梵網一喻也。若
有宿根大力量人。一聞此說。卽秉金剛光明寶戒。
耀定慧鋒。裂諸見網。則當下灼見梵網之珠象不
同。而光光互射。世界各別。而不壞一眞。眾生心異。
而性本無差。業惑紛綸。而各無自相。聖賢科第等
差。而總一佛乘。我佛教門雖殊。而理無二致。如是
乃至胎卵濕化。皆本清淨菩提之心。了無妄境。而
色法。心法。常無常法。一切眾生數量等法。與夫空
觀。假觀。中道智理。觀行。輕重開遮。止作持犯。無量

權巧法門。蕩然一空。獨露戒光。爲自持用。又何勞
釋迦放光擊接。玄通問果行因。舍那詳答心地經
家據旨立題。羅什最後譯傳。道影道融。書布祖祖
授受不絕。與今直解發演其義哉。雖然戒光圓攝
至理無言。當知世尊向無言說中說。說而又說。而
直解向無解中解。解而又解者。不無歸宿。如佛說
二字。乃果人所具之才辯。梵網二字。乃因人所具
之莊嚴。若能回真向俗。始知佛佛說梵網以度人。
若能回因向果。始知人人持梵網以成佛。所謂因

該果海。果徹因源。如是卽以海墨書文。不盡題意。
但撮其要。只欲吾人初從凡夫持心地戒。中而寄
位梵天。此天上鄰四空。下接六凡。菩薩居此天中。
上弘下化。積劫修因。後成佛果。三身圓現。亦於此
天說梵網經也。五結歸其名者。世尊所說一大藏
時教總名曰修多羅。亦云修妬路。亦云素怛嚩華。
言契經者。上契諸佛之理。合道而言。下契眾生之
機。逗根而說。故曰契經。亦云經者線也。言理發於
文。如線貫花。亦若梵網珠像有異。繇線貫絡以成。

譬夫三十心十地十重四十八輕戒法有異。繇一佛戒貫攝以成。亦云經者徑也。如人行正路直抵中堂。譬夫持光明金剛寶戒。徑成佛道。亦云涌泉。亦云繩墨。此皆隨義立名。扣其擊節。總不出貫攝常法四字。貫者貫串諸法之旨趣。攝者攝持所化之機宜。常者古今不變。法者凡聖同軌。上四字所詮之義。下一字能詮之文。能所合目爲題。故名佛說梵網經。

○二釋譯人名

卷之三十一

姚秦三藏法師鳩摩羅什奉 詔譯

姚秦者秦國之主。姓姚名興。標明代氏。揀非符秦時也。三藏等者。乃譯師之名德。三藏。卽經律論經。詮一心常住不變之理。律規三業。體淨無爲之道。論覈是非。刊定邪正之規。法師。卽佛法所屬也。謂此大師學解三藏。以法自師。以法師人。就德彰名。故曰三藏法師。鳩摩羅者。華言童壽。師童年而有耆德。故云童壽。什者。謂善識此方文字知識。七佛以來譯經師也。奉詔者。奉秦王之詔命。而翻譯此

卷之三十一

經故譯者易也。易梵國之語。成華夏之言。華梵並舉。合目爲題。故云鳩摩羅什奉 詔譯。

○三釋經品題

菩薩心地品之上

此一經之品題。菩薩二字。半梵語。具云菩提薩埵。華言覺有情。西域好廣。此方喜略。惟存菩薩。義含菩提。乃上弘下化之人也。心地二字。總有二義。一當本經而言。心卽三心。地卽十地。二指法而言。卽是眾生本元心地。謂此心地。能攝世出世間法。

35

故世間法卽六凡。謂諸天世人。修羅地獄。餓鬼畜生。出世法卽四聖。謂聲聞緣覺菩薩諸佛。凡聖雖殊。而此心地。原無差別。但以迷悟淺深。有凡聖次第大小之殊。如迷此心地。造五逆十惡等因。故有地獄。如慳貪嫉妒等因。故有餓鬼。若亂倫理欺罔騙害等因。故有畜生。如受三皈五戒等因。故有人道。如瞋心作福。剛強卒惡等因。故感修羅道。精修十善。習學禪定。故生天道。聞四諦聲悟入。故名聲聞。作還滅觀。了緣生空。故名緣覺。智理觀行自利。

36

慈悲喜捨利生。故名菩薩。歷三祇。圓萬行。空五住。
破二死。故名如來。如是四聖六凡之十法界。皆本
心地中。迷悟差別。若能一念不起。頓契無生。則凡
聖迷悟。當下銷殞。故菩薩悟此心地。現自受用。而
又以此心地。教一切眾生。現他受用。蓋此心地。乃
一切眾生分上。日用尋常。六根門頭。自受用境界。
繇無明封蔀。不自覺知。諸佛所證證此。菩薩所修。
修此。眾生所迷亦迷此。如來愍念。興慈運悲。往來
三界八千餘返。祇爲發明一切眾生本有心地。唯

欲眾生依此心地。稟受金剛光明寶戒。爲本修因。
故下卷云。一切佛本源。一切菩薩本源。佛性種子。
一切眾生皆有佛性。一切意識。色心。是情是心。皆
入佛性戒中。當當常有因。故當當常住法身。所以
說眾生受佛戒。卽入諸佛位。佛戒者。卽眾生心地
光明金剛寶戒也。世尊初從妙光堂。終至首羅宮。
十處說法。次第敷演。結歸究竟。心藏地藏。戒藏無
量行願藏。因果佛性常住藏。總而言之。名曰心地
法門。故命品題曰。心地品。品者類也。眾類相從之

義。此經大部一百一十二卷。六十一品。此當第十。菩薩心地品。此一品之文分爲二卷。上明菩薩理智觀行修證階級。卽三十心十地也。下明菩薩心地戒法。輕重開遮。止作持犯。卽五十八戒也。卷有上下之分。此卷居上。故曰品之上。

○四明分科義

凡經皆有序。正流通三分。序分者。序一經之來源。彰說法之繇致。正宗者。明一經之宗旨。逗眾生之機宜。流通者。繼遐芳於萬古。俾化導之不絕也。序

分。有通有別。通謂諸經通用。以諸經之首皆有如是。是我聞。一時佛住某處。與某大眾俱。一切經初。同有此序。故名通序。別謂當經發起。以諸經繇致。各有緣起不同。故名別序。此經心地品。既在大部六十一品中。當第十品。唯屬正宗。通序居首品。流通居末品。故無如是。是我聞等句。若唯約本品首尾文義之中。而分序正流通者。一序分。從爾時釋迦牟尼佛。在第四禪地中起。至問此光光爲何等相止。二正宗分。從是時釋迦卽攀接此世界眾起。至下

卷四十八輕止。三流通分。從諸佛子聽。十重四十
八輕戒起。至於卷終。此一經大科之義也。

○五正解經文^三 初明序起分 二明正宗分
三明流通分

○初明序起分^四 初化佛說法 二放光現瑞
三觀光生疑 四玄主集問

○初化佛說法

爾時釋迦牟尼佛。在第四禪地中。摩醯首羅天王宮。
與無量大梵天王。不可說不可說菩薩眾。說蓮華臺

禪阿羅漢卷之三

三

41

藏世界。盧舍那佛所說心地法門品。

此敘說心地法門品之由致也。爾時者。即無量天
人菩薩大眾集會之時。釋迦牟尼佛者。標能化之
主。梵語釋迦牟尼。義翻能仁寂默。釋迦譜淨梵王
云。我子釋迦。以能仁表姓德。寂默顯理致。又能仁
不住涅槃。寂默不住生死。又名能忍。仁者忍也。以
聞善不即喜。聞惡不即怒。能含忍於善惡故。又於
無生寂滅。忍可忍證。故云忍也。又名能儒。更有多
義。文繁不錄。雖有多義。總之隨行隨德。以彰名也。

三三行集卷之三

一

42

在第四禪地中者。標所住之處。以顯法最勝也。在
者住也。謂以如法安住而住。所謂應如是住也。第
者次第。謂三界共九地。欲界爲一地。名五趣雜居
地。色界有四地。初禪名離生喜樂地。二禪名定生
喜樂地。三禪名離喜妙樂地。四禪名捨念清淨地。
無色界有四地。一。空無邊處地。二。識無邊處地。三。
無所有處地。四。非非想處地。此當色界第四禪捨
念清淨地中。乃摩醯首羅天王所住之處。亦名有
頂天。又名色究竟天。法雲地。菩薩多寄住於此處。

說法摩醯首羅。華言大自在。又云威靈。或云三目。
此天爲三界尊極之至。輔行記云。色界天王。三目
八臂。騎白牛。執白拂。有大威力。居菩薩住處。能知
三界雨滴之數。統攝大千世界。於色界中。此天獨
尊。卽統諸大梵天王之主也。佛欲顯此心地道戒。
甚深祕密清淨大法。獨尊無上。故在此大梵天王
宮中內庭而說也。與無量等者。標聽法之眾。顯佛
威德也。與無量大梵天王者。以一四天下。有十八
梵天。百億日月等。有百億大梵天王。故曰無量天。

梵天王也不可說不可說菩薩眾者。言法會聽眾。非是算數所知。以表此法。惟大根人。堪當與說。故說蓮華臺藏世界者。指受法之處。盧舍那佛所說者。明授法之人。說法有宗。傳其本也。梵語盧舍那。此云淨滿。諸惡淨盡。眾德悉滿。此卽圓滿報身佛。下卷廣明其義。心地法門品者。心地品。解見上文。法者軌持之義。門者通達之義。謂依法修行。直至佛地。所謂十方婆伽梵。一路涅槃門。又圓覺云。有大陀羅尼門等。故下卷云。汝諸佛子。轉我所說。與

一切眾生開心地道。次第說我上心地法門品。受持讀誦。一心而行。又千釋迦千百億釋迦受持而去。各各放光。光中化佛。獻華供佛。又從定而入。復從定而出。或次第說。或頓圓說。蓋謂得此門者。若隱若顯。若出若沒。隨心開合。權實自在。故云法門也。

○二放光現瑞

是時釋迦身放慧光。所照從此天王宮。乃至蓮華臺藏世界。

此敘發起之緣也。如法華欲說諸佛一乘實相。故世尊先從眉間放一道白毫相光。光中圓現法界事相。生佛始終。爲發起之緣。此經欲說心地希有妙法。世尊必現希有瑞應。故先身放慧光。爲開發之緣也。此光全身顯露。是本有如如智慧果德光明。繇戒定力而生。然此智光。非諸佛獨有。一切眾生皆具。但以無明執著。不能證得。故世尊以種種方便。放種種光明。說種種戒法。無非發明人人本有心地。戒光若能會得此光。非從外來者。卽獲自

己無明窟中戒定慧光。與三世諸佛等無差別矣。從此天王宮。乃至蓮華臺藏世界者。示慧光所照之處。顯情與無情。無非一光所攝盡也。

○三觀光生疑

其中一切世界。一切眾生。各各相視。歡喜快樂。而未能知此光。光何因。何緣。皆生疑念。無量天人。亦生疑念。

此正敘明發問之端也。其中一切等者。總舉依正二報。卽指天宮華藏之兩間中。凡係佛光所照一

切世界。所有一切眾生。莫不各各相視其光。歡喜快樂也。類數無量。故名一切。眾法相生。故名眾生。此光昔無。於此忽覩。故各各相視。既覩其光。必獲饒益。故曰歡喜快樂。而未能知此光等者。實光雖覩。塵相未空。肉眼凡夫。徒被其照。故未能知此光因緣。豈惟博地眾生。皆生疑念。卽有身光之無量天人。心慧昏蒙。於佛身光。莫知所出。亦生疑念也。上敘人天不達佛光因緣之所以竟。

○四玄主集問 一 初起定放光 二 眾集發問

○初起定放光

爾時眾中玄通華光主菩薩。從大莊嚴華光明三昧起。以佛神力。放金剛白雲色光。光照一切世界。

爾時者。卽人天生疑作念之時。眾中等者。此舉眾明當機也。眾有四。一。當機眾。二。發起眾。三。影響眾。四。結緣眾。此菩薩是華藏海會。不可說不可說四眾之中。當機首領大菩薩眾也。佛放此光甚深微妙。難解難知。非具大智慧者。不能曉了。惟此菩薩具大行華。智慧明妙。通達此光之道。能爲眾中作。

唱導之主。以德彰名。故云玄通華光主菩薩從大莊嚴華光三昧起者。此明因依果起義。大即體大。莊嚴即相大。華光明即用大。乃法報化三身之圓果也。又莊嚴表果。華光明表因。謂因果齊彰。主伴重重義。莊嚴法身果海有三。一。六度萬行。二。一切智慧。三。第一義諦。其中華乃行華。即福德莊嚴。光明乃智慧。即智慧莊嚴。三昧乃正定。亦名正受。即第一義諦莊嚴。此三克備。故名大莊嚴。此菩薩住是定中。即從是定而起。又大莊嚴三昧。即大定之

別名。如來妙定。有百千萬億恆河沙等三昧。總之無量三昧。皆從此二三昧流出。而一切法身大士。咸住此三昧法性土中。應緣即現。故云從大莊嚴華光明三昧起也。菩薩請問大法。必仗如來神力。加被放光。召眾。方能發起智問。是故以佛神力。放金剛白雲色光者。正顯心地光明。金剛寶戒照用之義。言此戒光。能破性障。故曰金剛淨智如幻。故曰白雲色。又菩薩在因。惟素法身。故曰白雲色也。光照一切世界者。顯此光照處。周徧圓融。而無障

礙。又顯聖凡依正。總是一光所攝。蓋釋迦如來。身放慧光。卽舉果以明因。今華光主菩薩。全身所放白雲色光。卽因中境界。舉因以該果。所謂因該果海。果徹因源也。此菩薩正欲令諸眾生。知因識果。冀果修因。必以本光明金剛寶戒爲因地心。方證本法身智身功德身之慧果也。向下釋迦請問。舍那酬答。正顯卽果卽因。卽因卽果。因果不二之義。

○二眾集發問

是中一切菩薩。皆來集會。與共同心。異口問此光。光

法華經疏卷上之二

三

53

爲何等相。

此敘問果明因義也。是中等者。謂因之主放光。光照十方世界。是十方世界中。一切諸大菩薩。以此光明皆來集會。不約而同。法華云。尋光共推之。亦此義也。與共同心者。因光悚動。同示一疑而問故。異口者。人各有身。口隨身異故。問此光。光爲何等相者。卽問釋迦如來全身所放慧光之相。此光卽果中境界。前眾生未發菩薩心。祇疑因緣。故曰。何因何緣。此諸菩薩是因中人。只問果中之事故。曰。

法華經疏卷上之二

三

54

光爲何等相。何因何緣。卽下釋迦請問舍那云。一切眾生爲何因緣。得成菩薩十地道等文之案。光爲何等相。卽下請問當成佛果爲何等相之案。此序分竟。

○二明正宗分^二 初明心地道 二明心地戒

○初明心地道^四 初化佛代請 二舍那酬答

三華光請釋 四舍那酬釋

○初化佛代請^二 初攝生還本 二正請決疑

○初攝生還本

是時釋迦卽擎接此世界大眾。還至蓮華臺藏世界。百萬億紫金剛光明宮中。見盧舍那佛。坐百萬億蓮華赫赫光明座上。

此敘攝用歸體。生佛無差之義。是時者卽此人天大眾諸菩薩請問之時。釋迦是能化之迹佛。卽擎接此世界大眾者。乃所化之生也。在上曰擎。在下曰接。卽擎接此光光所照一切世界中。生疑集會有根性之大眾也。言還至者。謂此釋迦與諸菩薩。一切眾生。元從華藏世界。舍那本迹心地戒中。

光流出。今復還歸本體故。蓮華臺等者。卽舍那本
迹之處。蓮華臺藏世界。詳在後文。億有四億。百億。
千億。萬億。萬萬億。此乃四億中百萬億也。紫金剛
光明。表菩提智境。宮中。表涅槃理境。謂理因智明。
智繇理發。以理冥智。以智契理。理智圓融。法報無
礙。報化圓融。迹本不二。故見盧舍那佛者。釋迦旋
歸本界。覲面相覲。親見本師法身智身境界。回光
返照。卽本來面目。自己舍那。不從外得。坐百萬億
蓮華赫赫光明座上者。卽舍那所坐之座。此座以

法苑珠林卷之三

蓮華者。蓮之開敷。表權實雙彰義。在後詳釋。赫赫
光明者。赫赫卽光燄熾勝之貌。光明乃智慧照用
之相。謂智能破惑。表如來於因地中。以智慧燄。燒
煩惱薪。障惑盡淨。智理全彰。故感果中報德。住此
蓮華赫赫光明之座。自安安人也。俱名百萬億者。
卽千釋迦千百億釋迦光明蓮華。圍繞舍那宮座。
故云。百萬億赫赫蓮華光明之座。此明三身圓會
之相。華嚴廣明百萬億相。

○二正請決疑

法苑珠林卷之三

十六

時釋迦及諸大眾。一時禮敬盧舍那佛足下。已釋迦佛言。此世界中。地及虛空。一切眾生。爲何因緣得成菩薩十地道。當成佛果。爲何等相。如佛性本源品中。廣問一切菩薩種子。

此釋報化。假設問答。以顯說法之本旨也。時釋迦至釋迦佛言數句。敘請法之儀則。表三業虔誠也。禮佛足身業之誠。釋迦佛言。口業之誠。身口并致。意業之誠。諸佛請法。尙具此儀。餘請法者。自當尊重也。此世界中者。卽娑婆世界中也。地及虛空者。

地。卽人間。虛空。卽天上。一切眾生。卽釋迦如來。擎接人間天上。一切世界中。觀光生疑。根熟眾生也。爲何因緣得成菩薩十地道者。因緣卽因行道。卽佛果。意謂一切眾生。發菩提心。返妄歸真。欲修佛道。畢竟以何因行。方至佛果。此第一問。卽前天人疑何因何緣之意。當成佛果。爲何等相者。意謂當成佛果之時。畢竟何等境界。是第二問。卽上華光主放光集眾。同心異口問此光。光爲何等相之意。請問因緣。并何等相。向下舍那一。一領答詳明。此

是略問。在大部內。如佛性本源品中廣問一切菩薩種子佛性卽菩提心。乃本覺義言此覺體曾未遷改在眾生分中。名曰佛性。在非眾生分中。名曰法性。今舉在因。故名佛性菩薩種子。卽因地心也。此化佛代問文竟。

○二舍那酬答三 初總答心地 二廣答釋名

三結答問義

初總答心地四 初顯示定相 二誠聽思修

三陳自因行 四舉自果相

此問至三摩訶止

二

初顯示定相

爾時盧舍那佛卽大歡喜現虛空光體性。本源成佛常住法身三昧。示諸大眾。

前釋迦身放慧光。爲發問之端。是果中明因。次之主身放白雲色光。集眾興疑。是因中明果。今舍那答釋心地之道。不在別處。就是我與釋迦菩薩衆生若凡。若聖若因若果。總是一道光明。無二無別。故將自己一段受用境界。滿盤托出。示與諸人面前。要令人人直下承當。返本還源。識得自己本有。

光明金剛寶戒菩提涅槃真如佛性圓滿具足無
欠無餘。故將定光示諸大眾也。爾時者卽釋迦請
問時也。卽大歡喜者。謂宣說此心地法門。能令一
切眾生永離諸苦。得究竟樂。正是世尊本懷。故大
歡喜。現虛空光體性者。光卽本體智光。言智體卽
法身。法身本無形相。本無來往。本無遷改。猶若虛
空。無動無搖。萬象森羅。於中顯現。以智性卽色。故
能現於色。然以華光任運。若隱若顯。不離法身。故
曰虛空光體性也。本源成佛常住法身三昧者。如

木之有本。水之有源。一切諸佛。一切菩薩。修因證
果。無不依此本源智定爲因地心。成佛常住法身
道果。以顯三身圓現一光也。示諸大眾者。卽以此
本定光。示諸眾生使悟入也。

○二誠聽思修

是諸佛子諦聽善思修行。

此舍那如來。詔告當機法會大眾。誠聽勉進思修
意也。是諸佛子者。佛爲慈父。紹佛日子。諦聽等者。
卽聞思修三慧。諦者審也。聽者領也。謂諸大眾佛。

子若不審諦誠信而聽。則所聞之法。心不相應。心
法既不相應。心慧妙行何繇發起。故曼殊大士。於
楞嚴會上。獨選耳根圓通爲妙耳門。所謂此方眞
教體清淨。在音聞。欲取三摩提。實以聞中入。故先
誠聽也。善思修行者。謂善能體會所聞之法。如聽
而思。如思而修也。若不如聽而思。聽則無益。不如
思而修。思亦徒勞。所謂如人數他寶。自無半錢分。
於法不修行。多聞亦如是。故復誠思修也。必須如
是諦聽。如是善思。如是妙修。方契如如實相心地。

法門光明金剛寶戒。

○三陳自因行

我已百阿僧祇劫修行心地。以之爲因。初捨凡夫。成
等正覺。

此繇化佛初問。一切衆生爲何因緣得成菩薩十
地道。故報身佛述已過去所修所證爲答也。阿僧
祇華言無數。梵語劫波。此云分別時節。又云時分。
我已百阿僧祇劫。卽佛已修因證果之時分長遠
也。修行是心地。卽下文所明三十心十地也。以之

爲因者。正謂欲得道果。無有別法。卽以此本心地
法門而爲因也。前問中雙請爲何因緣。答中不言
緣者。乃因中具有緣義故。其義有三。一。本有光明
金剛寶戒。乃正因心。二。依教法起觀。修行心地法
門。是緣因心。三。無明淨盡。真如理圓。究竟無上菩
提。歸無所得。卽了因心。初捨凡夫。卽始覺破滅相
無明。百阿僧祇劫修行三十心。卽漸次覺破異相
無明。修行十地。卽隨分覺破住相無明。成等正覺
卽究竟覺破生相無明。我佛時歷百僧祇。方得五

住究盡。豈今妄誕之人。一朝一夕。微因微緣。小功
小行。一知半解。無明煩惱。貪瞋我慢。一毫未除。而
言頓超佛道者也。瓔珞經云。一切諸佛。不經三大
阿僧祇劫。得成無上正覺。無有是處。仁王般若亦
同此義。先悟毗盧性海。後行普賢行門。旨哉言乎。

○四舉自果相^二 初總明果相 二別明果相

○初總明果相

號爲盧舍那。住蓮華臺藏世界海。

此繇第二當成佛果爲何等相之問。故以己初捨

凡夫時。修習心地。乃至成等正覺。以如是等因。如是等緣。如是等果。而成如是等相。以答之也。言號爲者。因中自有師佛。記萌其名。因行未滿。只名菩薩。覺行既圓。成等正覺。故號爲盧舍那佛也。住蓮華臺藏世界海者。華藏世界。大香水海中。有一華臺。世界如蓮華形。故名蓮華臺藏世界海。華嚴經云。有二十重華藏世界海。皆在無邊妙華大香水海中。此世界種。乃是毗盧遮那如來。往昔於此界中。微塵數劫修菩薩行。親近微塵數諸佛時所嚴

淨。今感果住此也。而此娑婆世界。正當華藏第十三重。有十三佛刹微塵數世界圍繞。問。據華嚴云。卽是毗盧遮那如來出現之處。此經所云盧舍那佛。住蓮華臺藏世界海。二經何別。答。毗盧遮那法身也。盧舍那報身也。法身托報顯。報身因法成。若非法身無以有報身。非報身無以顯法身。乃知法報不分。三身圓現。不卽不離。非一非異。二經不別。是故盧舍那佛。住蓮華臺藏世界海。卽毗盧遮那佛。住蓮華藏莊嚴世界海也。海有十德。總而言之。

淵深廣大。包含萬物。無德不備。無相不現。流出一切。融攝一切。卽千釋迦。千百億釋迦。依報正報。無不從此華藏世界。盧舍那佛心海中流出。此上二節。總答因果二問。問何等因。卽最初悟此心地光明。金剛寶戒爲因。問何等緣。卽依法修行三十心十地爲緣。問何等果。卽成等正覺爲果。問何等相。卽依正莊嚴二報爲果相也。

○三別明果相一初從體起用 二攝用歸體

○初從體起用

其臺周徧有千葉。一葉一世界。爲千世界。我化爲千釋迦。據千世界。後就一葉世界。復有百億須彌山。百億日月。百億四天下。百億南閻浮提。百億菩薩釋迦。坐百億菩提樹下。各說汝所問菩提薩埵心地。其餘九百九十九釋迦。各各現千百億釋迦。亦復如是。

上總示果相。明依正之體。此別示果相。明依正之用也。其臺卽大香水海中之一大蓮華。華中有一蓮臺。臺上有一佛。佛卽舍那本佛。乃正報身佛也。臺卽舍那所居華臺。乃本迹佛身依報國土也。其

本華臺。周徧有千葉圍繞。而每一葉爲一世界。故
成千世界。此顯本迹依報。又現爲迹佛依報之世
界也。我化爲千釋迦等者。我卽舍那自稱揀非權
小凡外之我。此顯本迹佛身。又化迹佛之身。現爲
迹依界中教主。此一界中佛。皆舍那化身。故曰
我化爲千釋迦據千世界。後就一下。顯迹依土。又
化爲迹迹佛身依報國土也。言後就一葉等者。卽
千葉中。拈最後一葉而例言之。此一迹華。又現爲
百億之華。每一華爲一世界。故有百億世界。

每一世界中。有一須彌山。故有百億須彌山。
梵語須彌。此云妙高。以眾寶所成。出過諸山。故每
一須彌山。有一日月繞須彌盧。故有百億日
月。每一日月。一日一夜遊四天下。故有百億四
天下。每一四天下。有一南閻浮提。故有百億
南閻浮提。梵語閻浮。此云勝金。以樹流金汁。河出
金沙故。百億菩薩釋迦者。此又顯迹佛之身。而又
現迹迹佛身。卽千釋迦。一一化現百億釋迦爲當
機。故云。百億菩薩釋迦。坐百億等。此總結顯如來。

婆心示現受生出家成道轉法輪度眾生義。一一
釋迦皆示現八相成道。二始同時皆不離菩提樹
而昇四王剎利。乃至梵天皆說舍那所傳心地法
門。皆放身光鼓動人天。故曰坐百億菩提樹下。各
說汝所問菩提薩埵心地也。其餘九百等者。上拈
千華中。一華示現。千佛中。一佛示現。其餘九百九
十九釋迦。又作云何。其一華一佛。既如是示現。則
餘九百九十九釋迦。依正亦皆各各示現。乃至請
問心地法門。亦復如是。無二無別。

○二攝用歸體

千華上佛。是吾化身。千百億釋迦。是千釋迦化身。吾
以爲本源。名爲盧舍那佛。

此舍那。知凡小不能通達。卽體之用。而謂實有本
迹應迹之分。故言千百億釋迦。是千釋迦之化身。
千釋迦。是舍那之化身也。上其臺等。是明從體起
用。卽卽體之用。此明攝用歸體。卽卽用之體。正明
體不離用。用不離體。體用不二。故曰。吾以爲本源。
名爲盧舍那佛。上廣答果相竟。

○二廣答因相一 初標牒問詞 二釋心地名

○初標牒問詞

爾時蓮華臺藏座上盧舍那佛。廣答告千釋迦千百億釋迦所問心地法品。

爾時者當爾發明本迹徧現攝用歸體之時。廣答者對上略答而言。上只略答我已百劫修行心地。又恐法眾不知是何等心地。故標牒問詞。下詳答之。

○二釋心地名四 初釋十住名 二釋十行名

六四至五字之二

三

三釋十向名 四釋十地名

○初釋十住名

諸佛當知。堅信忍中。十發趣心向果。一捨心。二戒心。三忍心。四進心。五定心。六慧心。七願心。八護心。九喜心。十頂心。

此釋十住心名德位也。諸佛當知者。謂千釋迦。千。百億釋迦。今為當機。故詔告之。堅信忍中。十發趣心向果者。地持經云。十住。十行。名種性住。種。即種子。有發生之義。性為性分。乃自分不改之義。以初

李維經正角先丁之二

三

住位。卽中道種成就。安住其中。無有退失。數數增進。故名種性住。瓔珞經云。三賢十地等妙諸菩薩。分爲六位。各具性觀慧堅忍五法。每一法隨六位分爲六種。此十住位。於六性中。此名習種性。習謂習學。研習空觀。破見思惑。故於六觀中。此名住觀。住卽安住。謂心會於理。名住觀。卽觀照。謂觀察諦審一切諸法。緣生性空。名觀。卽修習空觀之理。蕩一切法。二義合言。故名住觀。於六慧中。此名聞慧。達耳曰聞。分別曰慧。因聞中道之理。而生一切無

漏智慧。能了一切法。離二邊相。旋轉聞根。故堅信忍中者。乃有二義。堅者。於六堅中。此名信堅。信卽信心。堅卽堅實。謂信一切法。皆卽真諦。無毀壞故。忍者。於六忍中。此名信忍。信卽信心。忍卽安忍。謂信一切法。皆悉空寂。能於空法。忍可忍證。以二法合言。名堅信忍也。中者。言此堅信忍中。有十種人。俱發上弘下化廣大之心。趣向佛海。無能退轉。起信論云。分別發趣道相者。謂一切諸佛所證之道。一切菩薩發心修行。趣向義故。略說發心有三種。

一信成就發心。二解行發心。三證發心。此信成就發心者。依不定聚眾生。有熏習善根力故。信業果報。起厭離心。求菩提道。得值諸佛。親承供養。修經萬劫。信心成就。或佛菩薩教令發心。或以大悲願力。或因護法因緣。能自發心。如是信成發心。入正定聚。畢竟不退。名住如來種中。正因相應。故名信成就發心。又發心有三種。一者直心。正念真如法故。二者深心。樂集諸善行故。三者悲心。欲拔一切苦故。如是發心。皆得不退。故云堅信忍中。十發趣

心向果。何名十心。一者捨心。捨卽施捨。無所悔惜之義。謂以內法外法。一切皆捨。通達無爲無相。入空三昧故。二者戒心。戒卽戒律。護善遮惡之義。謂以一切善惡諸法。無集無受。一切性離。一道清淨故。三者忍心。忍卽忍可。安忍不動之義。謂以無相慧忍。入一切空空忍。一切法如忍相。不可得故。四者進心。進卽精進。趨向無退之義。謂以四威儀中。登無生山。入空入假。亦無二相。進分善根故。五者定心。定卽禪定。不昏不散之義。謂以心念寂然。滅

一切罪。生一切善故。六者慧心。慧卽智慧。照了無礙之義。謂以不可說觀慧智。入中道一諦理。無明障破。皆爲慧用故。七者願心。願卽願樂。上來下化之義。謂初發求心。中間修道行滿。願足。佛果便成故。八者護心。護卽護持。善能隄防之義。謂以無相護。護使諸外道人。倒不燒。正信以護根本。法體集散。不可護故。九者喜心。喜卽歡喜。離苦得樂之義。謂見他人得樂。常生喜悅。靜照樂心。緣一切法故。十者頂心。頂卽人頂。無過於上。尊貴之義。謂以最

上頂智。滅無我輪。斷除十使。不受六道果。住頂三昧。正定。發行趨道性實。不離正信故。自此十心圓明。空觀成就。理性漸顯。眞諦不立。從此解脫。趨進行位也。瓔珞經云。以銅銀。金。琉璃。水晶。瑪瑙之六輪對住。行向地等妙之六位。以輪對者。具有二義。一運轉。二摧輾。謂佛菩薩運轉於大法輪。則能摧輾眾生之惑業故。因斷惑證眞。各有淺深次第不同。故以六輪對六位也。問此十住位。以何輪對。答以銅寶輪對。何故以銅。蓋似金色。不具金用。雖無

鐵之塵垢。而獨有渣滓在。若乃煉磨攻治。則能成諸器皿。濟用於世。謂十住諸菩薩。惟修空觀。斷見思惑。如離塵垢。四十二品無明之中。十住位人。斷前滅相一品。異相十品。若前異相十品。未能斷盡。如銅之有渣滓。惑既分斷。德亦分顯。故能隨體起用。隨類現形。化諸衆生。如器成濟世。故以銅寶輪對十住位。

○二釋十行名

諸佛當知。從是十發趣心。入堅法忍中。十長養心向

大智度論卷之三

三三

果。一慈心。二悲心。三喜心。四捨心。五施心。六好語心。七益心。八同心。九定心。十慧心。

此釋十行心名德位也。此位於六性中。此爲性種性。謂乃雖證本性真空。而不沈住空理。即能分別諸法。開化衆生。使令入佛道故。於六觀中。此爲行觀。行爲修行。以修習假觀行。立一切法。二義合言。故名行觀。於六慧中。此名思慧。思謂審思。勝思。決定思。慧即擇法覺慧。以思惟中道理。發生無漏智。慧。開化衆生。二義合言。故云思慧。諸佛當知一句。

大智度論卷之三

三三

結前。入堅法忍中等起後。前住云堅信忍。此行云
堅法忍何也。即前所修理法。理繇信入信。繇理起
是故前云堅信。此云堅法。於六堅中。此名法堅。謂
知諸法。皆即俗諦。無毀壞故。於六忍中。此名法忍。
雖知諸法皆空。無所有相。而能假立諸法。以化衆
生。於假法中。忍可忍證。以此二法合言。故名堅法
忍也。此位以前十住真理。深入玄妙。菩提妙行。依
理而起。運四無量之心。行四攝法。饒益衆生。長養
聖胎。成就聖德。向佛果海。故云十長養心。向菩提

果。何名十長養心。一者慈心。愛念衆生。化被一切。
能生正性。不繇魔教。使得樂果故。二者悲心。愍念
衆生。以悲空空無相。自滅一切苦。與一切衆生平
等一樂。起大悲故。三者喜心。慶他得樂。空空喜心。
令諸衆生。入正信。捨邪見。背六道苦。故喜。四者捨
心。周給無吝。無造無相。空法中如虛空。自他體性
不可得。而無生心。常修其捨。五者施心。普惠無惜
身施。口施。意施。財施。法施。教導一切衆生。無心行
化。達理達施。一切相現在前行。六者好語心。所說

皆善慈愛語言。攝化眾生。常行如心。發起善根。七者利益心。勝行化生。實智體性。廣行智道。現行六道。不以爲患。但益人爲利。八者同心。隱同攝化。以道性智。同空無生法中。以無我智。同生無二。入諸六道身相行業。一切事同。以入同法三昧。九者定心。印持無亂。以一念靜慧觀空。無能擾動。了見一切眾生。我人種子。皆無合散。集成起作。不可得故。十者慧心。照徹無礙。觀諸邪見結患等縛。無決定體性。是心入起空空道。發無生心。自此十心。行行

無違定慧圓明空假不立。以中道智觀增進向位也。此位功行。於六輪中。以銀寶輪對位。謂銀體性瑩潔。不受塵垢。雖經鎔煉。性恆不變。此十行菩薩。惟修假觀。以加功用。任運分斷中十品異相。無明惑業。顯發本然清淨之性。如銀體瑩潔。鎔煉不變。故以銀寶輪對十行位也。

○三釋十向名

諸佛當知。從是十長養心。入堅修忍中。十金剛心向果。一信心。二念心。三回向心。四達心。五直心。六不退

心。七大乘心。八無相心。九慧心。十不壞心。

此釋十迴向心名德位也。迴向心者。因前二位所修所證一切智行。不墮不退不住。空假不立。心心迴向真如平等法界理中。名迴向心。諸佛當知二句。結前入堅修忍中等起後言。從是等者。繇前十行。如苗增長華果敷實。將華落果成時。更加堅勇其心。不被魔外侵損。此位於六性中。名道種性。因修中道。通達佛法。能起一切眾生菩提道種。故於六觀中。此名向觀。謂向法界真如實際故。於六慧

卷四 聖賢菩薩品之二

三三

91

中。此名修慧。謂修中道理。發生無漏智慧故。前云堅法忍。此云堅修忍。具有二義。於六堅中。名為修堅。謂修中觀。了知諸法。皆即中諦。無毀壞故。於六忍中。此名修忍。謂即修習中道。知一切法。事理和融。於中道理。忍可忍證。二義合言。名堅修忍。此十向位。即解行發心也。前十住心。繇信滿故而入。此十向心。繇行滿故而入。以是菩薩。於第一阿僧祇劫。將欲滿故。即於真如法中。深解現前。於是心實相。念念真如。行行圓融。修金剛三昧定。集一

卷四 聖賢菩薩品之二

三三

92

切行法門。深入理觀。轉更增明。入佛果海。故云從
是十長養心。入堅修忍中。十金剛心向果也。何名
十迴向心。一者信心。但信自心。決定成佛。永無疑
執。故二者念心。念念不失。一切諸佛正智。於大乘
六念。常覺常施。一合相故。三者迴向心。迴卽不住。
向卽不退。於此無上金剛菩提。心心入空。而無去
來。幻化受果。深深心解脫故。四者達心。達卽通達。
照徹無礙。內外清淨。空空如如。相不可得故。五者
直心。直卽正直。直照平等。入無生智。無明神我空。

大方廣華嚴經卷之三十一

三十一

93

於空三界生者。結縛而不受。故六者不退心。不退
入凡夫地。不起新長養諸邪見。常空生心。心入不
二。爲不退一道一照故。七者大乘心。解解一空。以
一空智。智乘行乘。任載任用。令諸眾生。同入佛海
故。八者無相心。卽心無相。妄想解脫。照般若波羅
蜜。無二相故。九者慧心。無量法界。無集無受。生生
生煩惱而不縛。光明照性。入一切法故。十者不壞
心。入魔不壞。入佛威神。出沒自在。動大千界。於虛
空平等地心。無二無別。故於此十心圓滿。二空理。

大方廣華嚴經卷之三十一

三十一

94

顯。感諸佛加被。得摩頂三昧。證入虛空平等總持
法門。卽入十地也。此十向位。於六輪中。以金寶輪
對位。謂金體貴重。濟用極大。土埋火煉。其色不變。
此菩薩惟修中道。功行加深。教化亦廣。雖混眾塵。
不爲眾塵所染。雖居五欲。不爲五欲所燒。以斷盡
後十品異相無明。故以金寶輪對十迴向位也。此
上三賢觀行。雖各修一觀。乃瓔珞約本分位而言。
其實三觀圓修。卽一而三。卽三而一也。

○四釋十地相

諸佛當知。從是十金剛心。入堅聖忍中。十地向果。一
體性平等地。二體性善慧地。三體性光明地。四體性
爾炎地。五體性慧照地。六體性華光地。七體性滿足
地。八體性佛吼地。九體性華嚴地。十體性入佛界地。
諸佛當知一句。標牒舍那對千化佛答說十地名
德位也。從是一句。結前入堅聖忍中等起。後前三
賢修習聖行。功德圓足。得入平等地總持法門。自
此稱聖。故云從是十金剛心。入堅聖忍中。十地向
果。問前三賢位名心。十聖名曰地者何。答三賢位。

未證真如。非所依處。此十聖位。乃佛界地。爲一切所依。住一切功德。生一切功德。故易心名地也。此地於六性中。性爲正覺性。謂卽正與佛體等無別故。於六觀中。觀爲地觀。謂能生萬物。因修中道觀理。一切佛智功德。從此生故。於六慧中。爲無相慧。謂正知中道之理。惟空無相。而能發生一切無漏智慧。故言堅聖忍者。其義有二。於六堅中。地上菩薩。名爲德堅。謂修中道觀智。破一分無明等障。顯發一分真如三德。無能毀壞。故名德堅。於六忍中。

此名正忍。謂正破無明。於中道理。忍可忍證。故名正忍。二義合言。故名堅聖忍也。此卽名證發心。謂證真如法。故唯爲開導一切眾生。不依文字。起信廣明。已上總明十地義。向下別明十地義。何名十地。一。體性平等地。謂此菩薩證入諸佛法身平等大慧。眞實法門。攝受眾生。凡所作爲。其慧平等故。二。體性善慧地。此菩薩善修法身平等大慧。清淨明達一切善根故。三。體性光明地。此菩薩證發無邊妙慧光明。以三昧解了智。能知一切三世諸佛。

法門。入神通光明故。四體性爾炎地。此菩薩以智
慧燄。燒煩惱薪。以入善權方便。教化一切眾生。能
使見佛體性故。五體性慧照地。此菩薩以十力智
照。知善惡有無二性。起一切功德行。轉不可說不
可說法門故。六體性華光地。此菩薩以大智行華。
一時開敷。十神通明智品。現身示眾種種變化。百
千萬劫。說不可窮盡故。七體性滿足地。此菩薩具
足十八聖人智品。於一切國土中。隨諸眾生心行。
示現作佛。成道轉法輪故。八體性佛吼地。此菩薩

入法王位三昧。其智如佛。而以法藥施諸眾生。爲
大法師。破壞四魔。法身具足。說法無畏。如大獅子
吼故。九體性華嚴地。此菩薩得佛華嚴。善能守護
法身。以佛威儀。如來三昧自在。王定。王定出入無
時。於百億四天下。一時成佛。現無量身口意。說無
量法門品。而能轉諸魔界入佛界。轉佛界入魔界。
於一念中。一時示現如是事故。十體性入佛界地。
此菩薩以獲一切種智。得入金剛三昧。其大慧空
空復空。如虛空性。具足十功德品。復有不可說奇

妙法門。奇妙三昧門。陀羅尼門。非下地。凡夫心識所知。惟佛佛無量身心口意。可盡其源故。自此十地圓滿。等入如來妙覺果海。此地菩薩功德。於六輪中。以瑠璃寶輪對位。以瑠璃寶出須彌山。一切眾寶皆不能壞。此十地菩薩所證真實。不為外魔之所動壞。故以瑠璃寶輪對十地位。此十聖地觀行斷證。初地斷上品惑。證下品智。自二地至七地。斷中品惑。證中品智。從八地至十地等。斷下品惑。證上品智。此即轉前五識相應心品。成所作智。

轉第六識相應心品。成妙觀察智。轉第七識相應心品。成平等性智。轉第八識相應心品。成大圓鏡智。四智圓明。三身圓現。所謂大圓無垢同時發。普照十方塵刹中。以上答釋心地名相竟。向下結答以勸修也。

○三結答問意。一初舉法陳因。二作勸修證。

○初舉法陳因。

是四十法門品。我先為菩薩時。修入佛果之根源。

是四十法門品者。總舉心地軌則以勸修也。我先

爲菩薩時者。此舉果明因也。修入佛果之根源者。此舉因明果也。若非勝因不得勝果。若非勝果焉顯勝因。舍那自指根源。以爲眾生修入榜樣。

二作勸修證

如是一切眾生。入發趣長養金剛十地。證當成果。無爲無相。大滿常住。十力。十八不共行。法身智身滿足。此總答前一問。以明修證之義。如是二字。承上自已成佛根源在斯。一切眾生當亦如我往昔行菩薩道。修入發趣長養金剛十地。四十賢聖之行。爲

因地心得證當成果。無爲無相。大滿常住。法身智身。滿足相好。無爲無相。卽顯法身。大滿常住。卽顯報身。十力。十八不共行。卽顯化身。法報不分。三身圓現。是爲法身智身滿足。以此三身。緣因地中修習心地。是以得果證身。宗鏡錄云。由轉根本之心。得證法身。根本心者。卽第八識。謂善惡等法。本此出生。若迷此識。卽爲生死。悟此識者。卽得涅槃。此識轉時。一時煩惱斷滅。已盡得證法身故。二轉依本之心。得證報身。依本心者。卽第七識。謂依八識

而起。如迷此識。卽起一切愚癡。悟此識者。卽起一切智慧。是故此識轉時。一切愚癡解脫。卽證得報身故。三轉起事之心。得證化身。起事心者。卽第六識。謂對六塵而起分別。以迷此識。卽起一切貪瞋癡等。惱害眾生。悟此識者。卽修一切戒定慧等品。饒益眾生。是故此識轉時。卽證得化身故。是以如來出世。說諸心地法門。無非要令一切眾生。斷惡修善。轉識成智。證三身圓十號故也。十力者。一。知是處非處智力。二。知過現未來業報智力。三。知諸

禪解脫三昧智力。四。知諸相勝劣根智力。五。知種種解智力。亦名欲力。六。知種種界智力。亦名性力。七。知一切至處道智力。八。知宿命無漏智力。九。知天眼無礙智力。十。知永斷諸習氣漏盡智力。十八不共法者。一。身無失。二。口無失。三。意無失。四。無不定心。五。無異想心。六。無不知捨心。七。欲無減。八。念無減。九。精進無減。十。智慧無減。十一。解脫無減。十二。解脫知見無減。十三。身業隨智慧行。十四。口業隨智慧行。十五。意業隨智慧行。十六。知過去無礙

十七。知現在無礙。十八。知未來無礙。此十八行云
不共者。以是諸佛自覺聖智境界。非權小菩薩所
共。更非凡夫境界可知。故云不共。

○三華光請釋一初總標報化 二別明當機

○初總標報化

爾時蓮華臺藏世界盧舍那佛。赫赫大光明座上。千
華上佛。千百億佛。一切世界佛。

此總標明體用不分。報化無二之義。言爾時者。卽
本舍那如來舉因明果勸修時也。此之華臺舍那。

卷三至三解卷之三

三

107

赫赫大光明座。千華上佛。千百億佛。俱已解見前
文。言一切世界佛者。是千百億化身釋迦如來。展
轉化化無量無盡智慧如來。居一切世界中。說法
利生。以表從心地戒法中。出生無量無盡智慧佛
也。下卷文云。微塵菩薩眾。由是成正覺者。此也。

○二別明當機

是座中有一菩薩。名華光王大智明菩薩。從座而立。
白盧舍那佛言。世尊佛上略開十發趣。十長養。十金
剛。十地名相。其一一義中未可解了。惟願說之。惟願

卷三至三解卷之三

三

108

說之妙極。金剛寶藏一切智門。如來百觀品中已明。

此一節文。總承前義而來。自從是時。釋迦身放慧光。人天生疑。玄通光主。放光聚眾。請問光相。釋迦擎眾。至舍那所。代前二問。請決其疑。舍那領答。從凡至聖。卽以心地爲因。當成佛果。果中境界。一一發明。又恐大眾雖聞心地爲因。不知是何心地。故又廣開名相。爲三十心十地。既有如是之名。如是之相。必有如是之義。若不發明義趣。將使行者莫知趣向。執相迷心。執事迷理。故華光王菩薩。請解

卷之三

三

101

其義。正謂涅槃心易曉。差別智難明也。是座中有一菩薩者。卽上千佛座中之果位菩薩也。華光王大智明者。前云玄通華光主。此云華光王大智明。正顯此心地戒法門。非具大智慧者。不能通問。所以斷惑證真。必以智慧爲首故也。從座而立。身業之誠。自盧舍那佛言。口業之誠。身口如如。心契實相。則意業之誠也。佛上略開十發趣。十長養。十金剛十地。四十法門名相。名相雖多。以相求之。則名相又爲略。故云略開名相。且略其義。尙廣其中一

卷之三

四

110

一義趣修斷觀智。未曾解了。必請詳明。故曰惟願說之。惟願說之。重敘請意。以表翹誠之至也。言妙極。金剛寶藏一切智門者。此請正觀。乃起方便觀行。以期佛果故也。妙極卽妙覺果海。金剛卽堅利之智。謂若至果海。非金剛智不能。此智一起。諸物不能壞。而能壞諸物。一切雜染諸惡種子。斷盡無餘。故云妙極金剛。此智具足一切功德。故云寶藏。能爲一切賢聖修斷方便。觀智根本。故云一切智門。如來下引證。以明此處文義。在大部內。如來百

法華經疏卷之二

三

觀品中。已更詳明矣。

○四舍那酬釋^四 初釋十住義 二釋十行義

三釋十向義 四釋十地義

○初釋十住義^一 初總標牒問 二別解其義

○初總標牒問

爾時盧舍那佛言。千佛諦聽。汝先言云何義者。發趣中。

此牒大智明菩薩。請釋其義。誠聽許說十住進修地位觀行之義。

法華經疏卷之二

四

○二別解其義十

○初釋捨心位

若佛子。一切捨國土城邑田宅金銀明珠男女己身。有爲諸物一切捨。無爲無相我人知見假會合成主者。造作我見。十二因緣無合無散無受者。十二入。十八界。五陰。一切一合相。無我我所相。假成諸法。若內一切法。外一切法。不捨不受。菩薩爾時名如假會觀現前故。捨心入空三昧。

初釋捨心之義。卽檀波羅蜜也。別經名發心住。謂

於諸劫之中。行十信心。不作邪見。廣求智慧而行捨心。捨有十種。總卽唯三。財法竭盡捨也。問心地法門位有四十。初明捨心者何也。答欲令趨佛道人。一切解脫。始望無上菩提。無餘涅槃。若於身心世界。不能盡捨。縱能修行。居然全體凡夫。入道何益。以故首示。眞爲生死志求佛道。應當漸漸。從外捨去。以至內捨。內外俱捨。捨亦復捨。如是之人。名爲肉身菩薩。乃可入道自利。因此檀度。則能廣攝眾生。而諸眾生亦易從化。若夫三賢位人。惟捨二

執麤惑。還有微細。我法二執。亦要盡捨。方證佛果。
是故一切菩薩位中。必以捨位居先。故初明捨心。
也。若佛子者。標能修之人。堪當大法。代佛化導。故
稱佛子。一切捨者。標所修之法。理智觀行。三輪體
空。內而根身。外而器界。一切諸有爲相。無所顧惜。
俱能捨之。無有追悔。故云。一切捨也。下凡佛子二
句。做此國土城邑。至一切捨一節。正明佛子捨心。
體用觀照之義。言國土等者。釋上一切捨事。以顯
空觀門也。謂乞寶位。卽捨國土城邑。不作主宰想。

如乞安養。卽捨田宅金銀明珠。不作貴重想。如乞
奴婢。卽捨男女。乃至己身。不作情愛想。盡其所有。
悉無一毫貪戀。但凡有爲諸物。一切盡捨。何以故。
以滿檀波羅蜜。莊嚴無上菩提故也。無爲無相。至
不捨不受一節。申明一切捨觀之義。國土城邑等
外物。屬於疏分。捨之猶易。男女己身。屬於親分。己
捨之甚難。且己身視男女。尤親。云何難捨能捨。以
此菩薩。了達身世。一切皆空。本來無爲無相。實無
有法。悉繇無明不覺展轉現起。於是我相人相。人

我之間情之所知。目之所見。妄認爲實。遂爾假借
眾緣合會而成主宰。稱我稱人。千臂經云。假會合
成立名生者。主字。念作生字亦可。謂卽不識緣生
如幻。執我執人造作我見。種種取捨。繇是我見造
作。故受生滅流轉。無有休息。輪迴不絕。十二因緣
等者。正名假會合成。立名生者。以顯緣生性空之
義。十二因緣者。蓋以無明爲因。行卽爲緣。行爲因。
識爲緣。識爲因。名色爲緣。名色爲因。六入爲緣。六
入爲因。觸爲緣。觸爲因。受爲緣。受爲因。愛爲緣。愛

爲因。取爲緣。取爲因。有爲緣。有爲因。生爲緣。生爲
因。老死憂悲苦惱爲緣。所謂因緣和合。虛妄有生。
因緣別離。虛妄名滅。故法華云。無明至老死。皆從
生緣有。旣從因緣有。亦從因緣滅也。無合無散。無
受者。釋上因緣如幻。法體本來靈明絕待之義。蓋
此因緣之法。緣會而生。法體本來不生。以本無生
死流轉之法。故云無合。緣盡而滅。法體本來不滅。
以本無解脫轉流之法。故云無散。旣無生滅合散。
其中亦無受彼生滅者。故云無受者。十二入等者。

上言十二因緣。是卽總舉三世生滅因果。此下別
釋現在之法。而欲一切眾生。在此六根門頭薦取。
不致向外馳求。楞嚴所云。輪生死。證涅槃。皆汝六
根。故於六根薦取。十二入者。六根六塵。互攝入故。
亦名十二處。謂眼爲色入處。色爲眼入處。耳爲聲
入處。聲爲耳入處。乃至意爲法入處。法是意入處。
所謂單根不立。獨境不生。根境相對。自無體性之
義。十八界者。界是分位。六根六塵六識分位之疆
界也。五陰亦名五蘊。卽色受想行識。質礙曰色。領

納曰受。緣慮曰想。遷流曰行。了別曰識。其云陰者。
以此五種蓋覆吾人。本有真性故。其云蘊者。繇此
五種集聚蘊藏而成妄身妄心。受無量生死故。此
五蘊。十二入。十八界。如來於諸經中。處處演說。爲
迷心者。開心說蘊。爲迷色者。開色說處。爲俱迷者。
開蘊說界。此之三科五蘊開合之法者。無非要令
一切眾生。知此虛幻。猶如空華。若能於此空華。了
知是妄。則當下永無生死輪轉矣。一切一合相者。
此明菩薩觀智。卽妄以明真義。謂觀身心世界。一

切諸有爲法當體全空之性。本來無爲無相。不繇假合而成。故曰一切一合相也。一合二字。正說無爲無相之處。與上假會合成之合字不同。旣曰無相。又曰一合相者。總無相中而妙言之。無我我所相者。此句總結上義所言五蘊十二入十八界等一切有爲法。旣一合相。誰有我者。推一我相。終不可得。旣無有我。誰有我所。究一所相。終不可得。以是故知因緣和合諸法。皆是假成也。是故所言若內一切法。五蘊身心等。若外一切法。國邑男女等。

此內外一切法。悉皆空空故。是以雖捨。不見有我爲能捨之人。亦不見有物爲我所捨之法。二性空故。其中自亦不見有受施者。以是三輪體空。故云不捨不受。菩薩爾時等下。結承捨觀之益。謂如上三輪空捨。菩薩當爾之時。是名如假會幻化觀照現在前故。而令捨心證入真空三昧。正定正受之利益也。如假會觀現前故者。謂此十住菩薩。修習空觀。蕩一切法。無所有相。今旣於假法上而修捨心。似同假觀。故名如假會觀現前也。此義千臂經中。

廣明。如是捨心。如是捨行。是名佛子無相捨心體用觀照也。

○二釋戒心位

若佛子。戒非非戒。無受者。十善戒。無師說法。欺盜。乃至邪見。無集者。慈良。清直。正實。正見。捨喜等。是十戒體性。制止八倒。一切性離。一道清淨。

此釋戒心之義。卽尸羅波羅蜜也。別經云。治地住。謂乃常隨空心。行諸法門。以嚴戒品。此戒總有三聚。十無盡戒。別則三千八萬無量戒也。非非戒下。

至無集者一節。正明佛子戒心體用觀照之義。于臂經中。於此非非戒上。有非戒二字。言非戒者。謂佛子之大戒。不同諸小乘人。有戒相可持。但束其身。而於戒性不能究竟明了。經云。戒性如虛空。持者爲迷倒。惟以菩薩大乘佛戒。體如虛空。受而無受。持而無持。乃爲非戒。而不墮常見故。非非戒者。謂佛子之大戒。又不同諸魔外道。分別有無。其言有戒。卽持牛狗等戒。望生天上。其言無戒。卽不受戒。妄談無戒可持。說姪慾癡。皆是梵行惡罵捶打。

無非佛事。縱貪瞋癡恚殺盜婬。未得言得。未證言證。疑誤眾生。自迷迷人。大妄語人。師及弟子。俱墮惡道。以是菩薩大戒。無受而受。無戒而戒。雖則了知戒性體如虛空。本無垢染。不妨隨順性戒修行。是故云非非戒。不同斷滅見也。言無受者。者字牒定佛子於小乘魔外諸所有戒。皆不受行。故云無受者。十善戒者。正明佛子大戒。謂此菩薩。所以不受行諸不善戒者。以但自精進。奉持三世諸佛所說十無盡藏波羅提木叉清淨妙戒故也。言無師

說法者。千臂經云。名無師說法戒。此卽光明金剛寶戒。言十善戒。固爲諸佛菩薩修行法門。乃卽一切眾生本體性中。各具足者。非從師說而有。故曰無師說法戒。欺盜乃至邪見。無集者。此明惡戒體空。欺謂欺誑。盜謂盜竊。俱從邪魔外道之戒而言。非泛指者。乃至二字。是超略言。謂此惡法之多。不能枚舉。假此二言。以該婬殺貪瞋癡等諸惡法也。邪見卽不正惡知見。具該六十二種。言無集者。謂小乘善戒。尙且無持無受。豈况欺等惡法。反可集

聚於心耶。故云無集者也。慈良清直。至是十戒體性一節。申明佛子戒心體用之義。所云慈者。良愍一切。則無殺生之念。良者。溫和善熟。則無盜竊之事。清者。體湛澄潔。則無染汙之行。直者。正直無私。則無虛誑之語。正實者。邪妄虛浮盡遣。則無沽酒之事。正見者。絲毫邪僻皆除。此一攝三。卽不說四。眾過不自讚毀他。不訕謗三寶。捨謂能捨而不悋。則無慳惜加毀之心。喜謂喜而不恚。則無瞋心不受悔之意。等者。統餘法言。謂此八者是前十善妙。

戒之全體性。故云是十戒體性。制止八倒三句。結明佛子戒心體用之益。謂此十戒全體本性大用之力。卽能禁制止絕。凡外八種顛倒。言八倒者。凡夫四倒。卽無常計常。無樂計樂。無我計我。不淨計淨。小乘四倒。常計無常。樂計無樂。我計無我。淨計不淨。此之八倒。總不達如來真常四德故耳。言一切性離者。菩薩了達自性本源之戒。謂不但惡戒體空。卽善戒亦體空。何以故。以屬對待故。善惡俱空。性於何有。其於正戒性離。邪戒性離。有戒性離。

無戒性離。持戒性離。毀戒性離。得戒性離。失戒性離。乃至一切依他偏計顛倒等性。俱永遠離。故云一切性離。一道清淨者。謂此顛倒之性。既已遠離。唯證一道無師所說清淨體性。光明金剛實戒。獨露顯現。以不思議業用。饒益眾生。如是受持。方名佛子戒心體用之觀照也。

○三釋忍心位

若佛子。忍有無相慧體性。一切空空忍。一切處忍。名無生行忍。一切處得名如苦忍。無量行。一名忍無

受無打無刀杖瞋心皆如如。無一一諦。一相無無相。有無有相。非非心相。緣無緣相。立住動止。我人縛解。一切法如忍相不可得。

此釋忍心之義。卽羸提波羅蜜也。別經名修行住。謂能修行忍力。長養眾善根故。忍者謂於逆順諸境。安然自如。乃卽造道之強力也。忍有多種。此中具六。以該一切。有無相慧體性。至無無相一節。正明佛子忍心體用觀照之義。有無相慧體性。一切空空忍者。千臂經云。此名無相慧忍。有卽本有不

從外得也。無相。卽如如理。慧卽如如智。謂此菩薩
忍心不在事迹之間。亦不離事。於此不離不卽之
處。本乎無相慧體。而起無相大智慧光。觀察世出
世間一切諸法。悉如虛空。無有色相。無彼無此。實
無二法。惟一體性。性淨無物。卽以無相之能開化
無相之所達。入一切空空。故云有無相慧體性。一
切空空忍也。一切處忍等者。千臂經中。名曰普願
行忍。謂一切空空之忍。凡一切處。無所非忍。以一
切處所忍之心。不見有少法生。不見有少法滅。以

無生滅。二俱離故。卽入無生。故云一切處忍。名無
生行忍也。言一切處得名如苦忍者。千臂經云。名
耐忍忍菩薩。因契無生行忍。更爲法界有情。修持
三種大忍。每被他人妒害之處。不見有苦可忍。菩
薩達境。惟心。心不自心。因境有心。境不自境。因心
有境。心境一空。得名如苦忍。所謂不因訕謗起冤
親。何表無生慈忍力也。無量行。一名忍者。千臂
經中。名曰無量行忍。此卽推廣所忍之行。總收上
一切處。能忍心智。與夫所忍心法。然雖無量行門。

種種不同。是則皆依無相慧體而起照用。是故所
云無量行。一一名爲無相慧忍也。無受無打無刀
杖。瞋心皆如如者。于臂經中。此名安受苦忍。申明
空上一切處如苦忍之事迹也。謂上難忍。易瞋之
中。分明以受刀杖所打。菩薩了達三輪體空。卽其
內心而推。覓一受相。了不可得。則無受打之我相。
故。卽其外境而推。覓一打相。本不可得。則無打我
之人相。故。卽其所中而推。刀杖本寂。則無所打刀
杖之眾生相。卽其能中而推。心本自如。則無忍苦

法華經疏卷之三

三

133

瞋心之壽者相。故云無受無打無刀杖。瞋心也。所
言皆如如者。此句釋上三無字義。以顯三輪空寂。
四相無從。故示總相云。皆如如也。無一一諦。一相
等者。于臂經中。名曰諦察法忍。此二句義。釋明皆
如如意。問。旣曰受打刀杖。瞋心。根境歷然。何故又
曰無受打刀杖。瞋心皆如如耶。答。所言皆如如者。
以無相慧體性忍中。本無世出世諦真俗二法。故
云無一一諦。此卽不墮常見。一相有實相也。雖云
無二諦相。不墮常見。惟恐又作斷見理會。故揭一

法華經疏卷之三

三

134

相示之。不墮斷見。十住菩薩作空觀時。觀一切法。當體皆空。無中無假無不空。惟空無相。故云一相。無無相者。此句雙申上義。問曰。既有一相。何名無一一諦。既云無一一諦。何有一相。豈尙有一相可得。而云無一一諦耶。答曰。云一相者。卽謂無相。無相而相。相卽無相。實無一相可得。故曰無無相也。有無有相。至緣無緣相一節。展轉釋破。外道偏計之性。以結忍中無相慧體性之義。有無有相者。乃總遣所忍之法相不可得。非非心相者。乃總遣能

忍之心相不可得。緣無緣相者。此乃雙遣能所俱相亦不可得。此三句義。是緊貼上無字說來。發明上無相亦無之義。有相者下乘也。無有相是所忍之法本空。而有此無有相。又非真空。心相者下乘也。非心相是能忍之心本空。而非此非心相。又非真空。緣相者下乘也。無緣相是忍智中本來能所一空。而緣此無緣相。又非真空。惟菩薩能所心境俱空。空亦復空。方是無相真空實相法忍也。立住動止等者。總結顯忍心觀智。破依他性。令證圓成。

實性也。立謂站立。住謂安住。動卽行動。止卽臥止。
我乃對人相而稱。人乃對我相而舉。縛者不空之
凡相。解者能空之聖相。於上有無有相等。一切諸
相。菩薩二六時中。四威儀處。一一照破。於立住動
止。其相無寂感之分。於我於人。其相無彼此之分。
於縛於解。其相無聖凡之分。諸相旣無。何有一切
法耶。忍法旣無。只有慧體。自照自觀。以爲忍行。又
何忍相之有哉。故曰。一切法如忍相不可得。所謂
不見一法卽如來。此則名爲觀自在。金剛云。若有

我相。人相卽非菩薩。又千臂經云。於一切法悉皆
無相。了了分明。忍性空寂。不可得故。皆此義也。如
是行忍。是名佛子無相慧忍體性之照用也。

○四釋進心位

若佛子。若四威儀。一切時行。伏空。假會法性。登無生
山。而見一切有無。如有如無。天地青黃赤白。一切入
乃至三寶智性。一切信進道。空。無生。無作。無慧。起空
入世諦法。亦無二相。續空心通達。進分善根。

此釋進心之義。卽毗黎耶波羅蜜也。別經名生貴

住。謂生在佛家。種性清淨。故梵語毗黎耶。此云精
進。謂精而不雜。進而不退。卽前施戒忍三法。勤策
不怠。乃智行無間之功力也。若四威儀。至亦無二
相一節。正明佛子進心體用觀照之義。四威儀者。
卽行住坐臥。四行精進。徧諸行故。以行字表其象。
一切時者。卽二六之時也。行伏空者。卽是空觀假
會法性。卽是假觀。登無生山。卽是中觀。三賢菩薩。
名伏忍位。初住位伏空。二行位伏假。三向位伏中。
雖分爲三。是各依本位得名。實互融攝。一而三。三

而一。菩薩於此行住坐臥。四行法門。以有威可畏。
能折伏眾生。有儀可表。攝受眾生。卽於此四儀處。
一切時中。進修菩提。降伏其心。而入於空。無法可
得。如鏡中相。無相可得。此卽行伏空也。言假會法
性者。承上。謂雖常入真空。觀照諸法。一切體性。然
而假合而成。卽假而真。離真無假。此卽行伏假也。
於假法上。當體明真。故云假會法性。言登無生山
者。謂此菩薩修無生理。最高最顯。在塵出塵。迥超
一邊。得無所礙。如登山頂。高出無礙。名登無生山

也。菩薩既蕩一切法空。不見纖法可生。復觀一切法假。不見毫法可滅。以無生滅。空假皆真。雙伏中道無生。故以登山爲喻也。而見一切有無者。申明登無生山之義。菩薩於四威儀。一切時中。思惟真諦之理。發生一切無漏智慧。了見一切內外四大。有無性相。諸法性空。空無所有。故云見一切有無。如有如無等者。牒定所觀世出世間染淨諸法。先觀世間之法。以無生心。見天地中。包羅青黃赤白。長短方圓。若根若塵。有質對待者。名一切顯現色。

若根若塵。無質對待者。名一切無表色。如四禪天。定中果色。并五根中一分淨色。及緣想過未來種種境界。現雖對待。無可表示。雖云無可表示。總色像攝。一切色相。元無實體。色法如此。心法亦然。無有一法。不是如來藏心。性淨明體。故云如有如無。一切入也。乃至三寶智性等者。此觀出世間法也。三寶。卽佛法僧智性。卽法身般若解脫。一切信進道。卽一切賢聖誠信進修之道。空無生無作。卽三解脫門義。謂此菩薩。緣觀世出世間。真淨體性之

理。性淨無物。故得證入三解脫門也。其空解脫門者。菩薩觀照一切諸法皆從因緣和合而生。其體本空。卽悟自性真空。而不隨因緣生。故得解脫也。無生解脫門者。卽無相解脫門也。承上既觀諸法。一切皆空。無相可得。既無有相。卽悟自性常生。而不隨因緣滅。故得解脫也。無作解脫門者。卽無願解脫門也。菩薩既觀諸法。空無有相。則無願求。既無願求。卽不造作生死之因。以無生死因故。卽無有果。故得解脫。解脫卽自在義。門卽通達義。以三

解脫。得至涅槃。故云三解脫也。無慧者。承上所觀諸法。既不可得。能觀智慧。豈可得哉。故云無慧。起空入世諦法者。謂向以觀凡聖有無諸法。體空。卽證入空定矣。此空不同聲聞緣覺。沈空滯寂之空。乃觀實際理中。纖塵不立。今世門頭。一法不捨。故雖證於空。忍而不住著。卽從伏空定忍而起入世諦法。雖然入真入俗。亦無二相。無二相者。謂入真不著真。而入俗不著俗。故云無二相。續空心通達等。此二句者。結顯無相精進之心。體用觀智之益。

續空心者。乃卽從假入空。從空入假。空假圓融。通
達無礙。以是通達實相心故。名續空心通達也。進
分善根者。善根。卽菩提本妙心。爲眾善根本故。卽
此無相心。發起種種精進。心心相續。念念無間。分
分增進。永無退轉。趨向佛位。故云進分善根。千臂
經云。佛子。於四威儀。進修菩提之時。卽得證入一
切三寶智性。眞淨體性。常得現前。則得生生值佛。
見法見僧。世世精進。學佛威儀。於伏空忍之理。亦
不見四威儀。證無生空。是以不進而進道也。又法

句云。若起精進心。是妄非精進。若能心不妄。精進
無有涯。如是精進。是名佛子進心體用之觀照也。

○五釋定心位

若佛子。寂滅無相無相。無量行。無量心三昧。凡夫聖
人。無不入三昧。體性相應。一切以定力故。我人作者。
受者。一切縛見性。是障因緣。散風動心。不寂而滅。空
空入倒無緣。假靜慧觀。一切假會。念念寂滅。一切三
界果罪性。皆繇定滅而生一切善。

此釋定心之義。卽禪波羅蜜也。別經名具足方便。

住。謂修習無量善根力故。寂滅無相無相。至空空
入倒無緣一節。正明佛子定心體用觀照之義。寂
滅者。此標定體。梵語禪那。此云寂滅。卽指一心而
言。亦云靜慮。卽攀緣如禪。亦云寂靜。謂根境如如。
不卽不離。若鏡現相。故云寂滅無相無相。此二無
相。釋寂滅義。上無相。明能定之心。下無相。明所定
之境。以是心境二皆無相。故云無相無相無量行。
無量心三昧者。明菩薩動靜一如義。緣入定時。以
無能所二相。故能契合無量心行。總成三昧。此卽

四威儀中常明禪觀。所謂那伽常在定。無有不定
時也。凡夫聖人無不入三昧者。此言定體平等。不
惟聖人入此三昧。凡夫亦入此定。旣爾何故說名
凡夫。以被一切識情垢染。故不自覺。亦如衣裏明
珠。不自覺知。貧苦他方。終無濟益。所謂終日圓覺。
而未嘗圓覺者。凡夫也。何以故。以體性不相應。安
能得定。菩薩不見一法當情。境空心寂。智理一如。
故恆與諸佛體性相應。緣證體性三昧。則一切時
中。以聖定力。故得照見一切微細。我人作者受者。

之妄惑也。我卽我見。人卽人見。作者自心施爲。卽
眾生見。受者領納好惡。堅著不捨。卽壽者見。繇此
四見生一切執縛。邪見種性。皆是障道因緣。被此
散亂境風。鼓動心海。隨波逐浪。流轉生死。無窮無
盡。無有休息。故云一切縛等。言不寂而滅者。謂此
障惑。若不假修寂滅。觀照三昧正定之力。而能滅
者。終無暫止之日。意謂必以寂滅定力。故而得此
滅。故云不寂而滅。千臂經云。不得寂靜定力。而能
滅者。無有是處。空空入倒無緣者。承上。謂此定力。

既止我見生滅之因。卽小乘凡外入倒生滅之緣
自空。故云入倒無緣。假靜慧觀。至而生一切善一
節。結顯定力照用功能之義。假靜止動。假慧照昏。
假此二者爲觀。定慧圓明。靜照一切。我人假會。幻
化合成。妄想因緣之法。念念從此寂滅矣。生滅顛
倒之念。既空。則一切三界異熟苦果。諸惡罪性。亦
皆繇此定力而滅。苦果罪性。既已滅盡。則本不生
不滅。無漏功德智慧。亦悉繇此定力而生。故云而
生一切善也。所謂生滅既滅。寂滅現前。如是修禪。

是名佛子定心之體用觀照也。

○六釋慧心位

若佛子。空慧非無緣。知體名心。分別一切法。假名主者。與道通同。取果行因。入聖捨凡。滅罪起福。縛解盡。是體性功用。一切見常樂我淨。煩惱慧性不明。故以慧爲首。修不可說觀慧。入中道一諦。其無明障慧。非相非來。非緣非罪。非八倒。無生滅。慧光明燄。爲照樂虛。方便轉變神通。以智體性所爲慧用故。

此釋慧心之義。卽般若波羅蜜也。別經名正心住。

七 阿 羅 漢 五 年 之 七 二 十

三 三

151

成就第六般若法門故。梵語般若。此云智慧。以是智能照境。慧能了境。於境分明無惑。能轉物也。空慧非無緣。至體性功用一節。正明佛子慧心體用觀照之義。言空慧非無緣者。謂此真空體性。本源妙慧。非是無緣而生。又非卽緣而生。是卽本有空慧靈明知體。名之爲心。不假他緣故也。以是真知覺體。本無分別。而言分別一切法者。惟是真心照用。不同二乘灰心泯智。不緣一切生法。亦不同諸凡夫外道。分別識心。繇假因緣會合而成。假名主

六 釋 慧 心 位 之 一

三 三

152

者。假立其名。實無主宰。雖曰是妄。皆卽依真而起。如水之波。依水而有。菩薩依般若智照。於諸妄心。了然無二。實與至道。通同一味。體無差別。故曰假名主者。與道通同也。取果行因等者。釋明慧心照用之義。謂此菩薩直超佛果。惟以本源平等空慧。修因地行。卽可入聖捨凡。滅罪起福。凡夫以我相分別。處處不得解脫。故縛。聖人無我。能以般若智照。處處皆得自在。故解。卽此凡聖迷悟縛解。菩薩視之。盡是體性功用。所謂從凡夫中來者。用其識

心。從聖性中來者。用其智慧。識智元無二體。惟在用處有差殊耳。一切見至所爲慧用。故一節。申明空慧觀照之益。問一切見者。凡聖縛解。何處差別。以凡夫二乘。一切倒見。皆由不知如來常樂我淨。無餘涅槃。真如德相。是心佛與眾生。三無差別。平等具足。乃於真常真樂真我真淨心上。而起倒見。故也。常者無暫改動之義。性體虛融。歷三際而不遷。混萬法而不變。故名常德。樂者安隱寂滅之義。離生死逼迫之苦。證涅槃寂滅之樂。故名樂德。我

者自在無礙之義。外道凡夫。強立主宰。執之爲我。乃是妄我。若佛所具。入自在爲我者。卽是真我。故名我德。淨者離垢無染之義。諸惑盡除。湛然清淨。如大圓鏡。了無纖翳。故名淨德。而凡夫人。迷而不知。反以非常計常。常計無常。非樂計樂。樂計無樂。非我計我。我計無我。不淨計淨。淨計無淨。是名八倒。非常計常者。世間一切諸有爲法。故悉無常。虛幻不實。執爲實有故。非樂計樂者。世間五欲之樂。皆是受苦之因。諸凡夫人。貪著不捨。不求解脫故。

非我計我者。四大假合之身。本非有我。於此幻色身中。強作主宰。妄執爲我故。不淨計淨者。自身他身。三十六物。五種不淨之身。本非是淨。反生貪著。以爲是淨故。如是四見。增長惑業。名爲凡夫四榮。倒見。常計無常者。法身常住。本無遷改。而於如來常住法身之中。妄計有變異故。樂計無樂者。涅槃大樂。離諸苦故。乃於如來涅槃樂中。妄計是苦故。我計無我者。無生真我。卽是真常。不了無我法中。佛性真我。於真我中。妄計無我故。淨計不淨者。體

性真淨。離諸垢染。不了無惑無障之淨。乃於如來
真淨法中。妄計不淨故。如是四見。乃二乘人觀察
無常。苦空。無我等法。俾煩惱有朽滅不生之義。名
爲四枯倒見。此八倒見。凡夫之人。凡所作爲。皆是
煩惱業力。將此慧性。障覆不開。不得真實識知用
故。所謂煩惱慧性不明故。名爲煩惱無明二障。煩
惱事障。障理無明理障。障事。其煩惱障者。謂此昏
煩之法。惱亂心神。因貪等惑。障蔽正道。故名煩惱
障。無明障者。謂諸眾生。從無始來。種種顛倒。而於

一切法上。無所明了。名無明障。此惑是業識之種
子。爲煩惱之根本。以二乘人。慧性不明。不能斷去
此障。惟菩薩斷之。欲破煩惱。必以智慧爲首。欲破
無明。必修不可說觀慧爲助。細審細察。智慧德相。
本來無遷無變。是如來常德。無生無死。是如來樂
德。無罣無礙。是如來我德。無障無惑。是如來淨德。
如是種種觀慧。相續相連。無間無斷。方乃證入中
道第一義諦。智起惑亡。卽無明惑障頓破。而本有
慧性頓開。向之無明煩惱爲障者。卽障慧性。故曰

無明障慧。今者了知無明障慧。當體全空。何有形相。故曰非相。既非形相。安有去來。故曰非來。既無去來。則非心所緣。故曰非緣。若有所緣。是為心境。不空。成顛倒。想起惑造業。則有生滅。因緣之罪法。今既非緣。則亦非罪矣。又何入倒生滅之有哉。故曰非入倒。無生滅。此惟菩薩慧光明。為照為樂。虛徹靈通。無量方便。無障無礙。無量轉變。種種神通。種種妙用。皆以平等智為體性。一切所為所用。無非空慧為用。故若不依此平等智體本源空慧。

以為照用。則凡所為所作。皆是無明業力使然。學者知之。當修此慧。是名佛子慧心體用之觀照也。

○七釋願心位

若佛子。願願大求。一切求。以果行因故。願心連。願心連。相續百劫。得佛滅罪。求求至心。無生空一願。觀觀入定照。無量見縛。以求心故。解脫無量妙行。以求心成菩提。無量功德。以求為本。初發求心。中間修道行滿願。故佛果便成觀。一諦中道。非陰非界非沒生。見見非。解慧是願體性。一切行本源。

此釋願心之義。卽願波羅蜜也。別經名不退住。入於無生畢竟空界故。願者願要。乃卽發諸大願成佛度生者也。願大求。至得佛滅罪一節。正明佛子願心體用觀照之義。願大求者。卽上求佛果。一切求者。卽下化眾生也。以果行因故者。釋上發願成佛度生之疑。經云。自未得度。先度人者。菩薩發心。自覺已圓。能覺他者。如來應世。今先自利。次乃利生。何以故。欲以果地之覺。而行因地心故。謂凡世出世間。有漏無漏。善惡因果。必有決定誓願。如地

藏菩薩。地獄未空。誓不成佛。觀音大士。度盡眾生。方證菩提。彌陀如來。四十八願。願願結云。不得是願。終不作佛。乃至閻羅天子。誓願治諸罪人。一一隨願而生。所以要度眾生。先當發願成佛也。願心連者。承上以果行因之願心故。須當念念不忘。心心無間。相連相續。百劫修行。難忍能忍。難捨能捨。外捨國城妻子。內捨頭目髓腦。乃至無量世界。無有如芥子許。非是菩薩捨身命處。如是心無能所。人法雙忘。忘亦復忘。始能得見本佛。滅無量罪。故

云得佛滅罪。求求至心。至佛果便成一願。申明願
心始終因果究竟之義。求求至心者。上求字。卽求
佛果。下求字。卽求化眾生。至心二字。謂求佛果及
化眾生之心。必須聯續增進。乃至大願成就。求無
所求。卽以無生空智。而契無生空理。智理一如。一
願平等。生佛無二。故云無生空一願也。觀觀入定
照者。雙明二觀。惟顯中道。以空觀入假觀。故照以
假觀入空觀。故定。如是一觀俱遣。空假不立。定慧
圓融。是卽照而常定。定而常照。卽此觀觀之照。照

照之觀。是故無量見縛。皆以上求下化之大願心。
平等觀照之定慧力。故得解脫。卽上滅罪之義。不
惟無量見縛。因求心故而得解脫。卽無量妙行。亦
以是願求求至心。故得成就阿耨菩提。卽上得佛
之義。乃至無量恆沙。稱性功德。亦皆以求心故而
爲根本。卽無生空一願之義。言初發下。勸必行也。
如是求心。非是空發願樂之心。而或不行願樂之
行。故必初發求心。中間修道行滿願足。是故佛果。
便得成就。初發求心。卽始覺也。中間修道。卽漸次

覺及隨分覺行滿願故。卽究竟覺。二覺果滿萬德
周圓。方能得成佛果。稱兩足尊。觀一諦中道至一
切行本源一節。此結願心中道觀慧爲願體性。爲
一切行本也。觀一諦中道者。承上謂於佛果位中。
觀中道一諦之理。不見立一切願。本無佛道可成。
本無眾生可度。本來無縛無解。菩提本具。功德本
圓。本如來藏妙真如性。所以觀五陰非五陰。觀十
八界非十八界。觀生滅非生滅。觀諸見非諸見。故
云見見非。解慧是願體性者。乃卽華嚴信解行證。

四法之一。菩薩初發願心。繇信起解。繇解發願。繇
願起行。繇行證果。非初解慧。無繇能入。如是妙慧。
爲一切願心本體。一切萬行本源。是故發願成佛
度生。必以無生空一願之中道智。解無生空一願
之中道理。卽依此起一切無相妙行。而卽證佛無
相菩提涅槃妙果。若他觀他願者。卽爲狂慧。卽爲
狂解矣。學者知之。

○八釋護心位

若佛子。護三寶護一切行功德。使外道入倒惡邪見。

不燒正信。滅我縛見縛。無生照達二諦。觀心現前。以護根本。無相護護。空無作無相。以心慧連慧連。入無生空道智道。皆明光明光護。觀入空假。分分幻化。幻化所起。如無如無。法體集散不可護。觀法亦爾。

此釋護心之義。卽力波羅蜜也。別經名童真住。謂不生邪倒破菩提心故。護者護持。不使魔外侵壞菩提心故。護三寶。至於護根本一節。正明佛子護心體用觀照之義。三寶卽佛法僧。佛者覺照義。法者執持義。僧者和合義。此有世間住持三寶有出

世間常住三寶有大乘小乘。一體別相。如是三寶。皆一切眾生法身慧命父母。良友福田。若不護持。卽法身慧命斷滅。一切功德無從而生。故當大力護持護三寶者無他。卽護自己所修六度萬行。一切所行功德。何名功德。卽於行門。無怠無惰。有始有終。是名爲功。無人無我。無取無捨。是名爲德。故云功德。仁王經云。以護佛果護十地行若此。使外道不燒者。正明護三寶義。外道有多種。凡不達心地道戒。向外馳求。俱名外道。其入倒者。卽諸凡夫。

小乘外道妄想倒執。此諸倒見不善不正。斷佛種
故。名惡邪見。言正信者。翻邪名正。除疑曰信。正其
所信。名曰正信。所謂護功德者。正在使諸外道。凡
小人倒惡邪知見。不能燒我。如是護三寶之正信
也。云何能令惡見不燒正信。亦無他法。但滅我縛
見縛。而信自正。蓋此顛倒邪見。緣依我見而生。因
執我故。則被我縛。緣我縛故。而起諸見。則被見縛。
我見相縛。所信不正。所信不正。則諸魔外得入魔
外。一入則壞一切功德。一切功德破壞。致令佛種

法種。僧種俱被破壞。故護三寶實無別法。唯護自
行功德。則滅我縛見縛。我見不生。卽入無生。卽以
無生理智。而起觀照。照空卽不沈空。照有卽不滯
有。空而不空。不墮斷見。有而不有。不墮常見。是以
不滯空有。不墮斷常。二諦圓融。互攝無礙。故云無
生照達二諦。卽此觀心。倏然現前。以護根本。其根
本者。卽正信也。以是正信一立。直超無上佛果而
無障礙。一切功德。從此生長。是故正信而爲根本。
以是護持。無有窮盡。故云觀心現前。以護根本。所

謂心性不迷。卽是佛寶。心體離念。卽是法寶。於理不違。卽是僧寶也。無相護護至皆明光明光一節。申明無生觀照工夫之益。蓋上以無生智觀照現前。以護信根。卽此能護觀照所護信根。一一無相。從無相護心中。行無相護行。故曰無相護護。以是無相護護。則所護之正信。處處解脫。以是處處解脫。卽證無相真空。以證無相空故。而無所造。而無所作。以無所造作故。名爲無相。故云空無作無相。以心慧連等者。承上。旣云入空無作無相之三解。

脫理慧。不同小乘住著解脫。卽此真空。無作無相之慧心中。相續相連。無間無斷。卽得深入無生空道。無生智道。皆明光明光矣。無生空道。卽是無餘涅槃理果。無生智道。卽是無上菩提智果。皆明光明光者。智理互照之象。繇智契理。因理冥智。智理如如。互發圓照。故云明光明光也。護觀入空假至。觀法亦爾一節。乃卽結遺觀法。以顯無相護心之義。言護觀入空假等者。承上旣以無相護心。深入智理。卽以如理平等。大慧光明。從護心中。而起觀。

照觀入於空。卽遣真相。觀入於假。卽遣俗相。空之
真相既遣。則空中之分分許多幻化。所滅何有。假
之俗相既遣。則假中之分分幻化。所起何有。以是
生卽如生。滅卽如滅。生滅皆如。故云如無如無。法
體集散不可護者。菩薩旣以無生妙慧。觀照諸法。
幻化起滅如無。故知諸法緣會而集。法體本自不
生。緣滅而散。法體本自不滅。旣諸法體本無集散。
則無實法可護。故云法體集散不可護也。言觀法
亦爾者。謂所護法體旣不可得。豈有能護智觀而

可存耶。故云觀法亦爾。是則境智俱遣了不可得。
如是觀行。如是正信。方能護持三寶功德。是爲佛
子護心之體用觀照也。

○九釋喜心位

若佛子。見他人得樂。常生喜悅。及一切物。假空照寂。
而不入有爲。不無寂然大樂。無合有受而化。有法而
見。云假法性平等一觀。心心行。多聞一切佛行功德。
無相喜智。心心生念而靜照樂心。緣一切法。

此釋喜心之義。卽方便波羅蜜也。別經名法王子

住。謂從佛正教而生於解。當紹佛位故喜者。卽歡
悅義。乃快自他得樂之謂。見他人得樂至大樂無
合一節。正明佛子喜心體用觀照之義。見他人得
樂者。卽喜境也。常生喜悅者。卽喜心也。何謂常生
菩薩喜悅之心。非因暫有。亦非暫無。從久遠來。發
菩提心。元爲令諸眾生離苦得樂。今見得樂之人。
適其所願。故心常生喜悅。及一切物者。明菩薩喜
心廣大之義。言不惟見人樂而生喜心。并見一切
有情物類。凡得樂者。亦常生喜悅也。假空照寂等

者。正明菩薩三觀圓修。以顯無相喜心之義。假卽
假觀。空卽空觀。照卽是慧。寂卽定也。菩薩喜心。不
同凡夫情見之喜。亦不同二乘空執之喜。二乘自
喜。得出三界苦惱之患。得證三解脫門。於菩薩法。
遊戲神通。及見眾生有苦樂時。不起悲忻。菩薩不
然。如觀人假時。照而常寂。而不入有爲。離此有相。
故不同凡夫情見之喜。如觀人空時。寂而常照。而
不入無爲。離此無相。故不同二乘空見之喜。旣不
空不假。不有不無。是何等境界。卽寂然大樂無合。

此等境界。非塵勞眾生所受用事。亦非二乘滯寂境界。惟是菩薩定慧圓融。乃能寂然大樂。又能樂及眾生。其所樂者。二邊不住。中道不立。故曰大樂無合也。有受而化。至心心念一節。申明喜心寂照之義。以其無合於有。不妨有受而化。受即喜心。化者不畱之意。有定力故不被物轉。以其無合於無。不妨有法而見。法即喜境。見者透徹之意。有慧力故。即能轉物。故云有受而化。有法而見。其云假者。謂以種種諸境。本無實體。當體如如。法性平等。

一觀照之法性。即法性身。諸佛以法為身。既觀諸法之相。云假。復觀諸法之性。本真。此法性身。不隨生滅。等虛空界。在聖不增。處凡不減。各各具足。是為平等一觀。所謂先悟毗盧法界也。心心行等者。乃復行普賢行門也。謂此菩薩。雖然智照諸法。體性平等。而法身理果。尚未究竟。更當心心發大願。起大行。一心一行。皆從多聞一切佛行功德而行。是即佛行。不落小乘功行。所謂盡行諸佛無量道法也。無相喜智。心心念。此二句者。承上菩薩思

惟諸佛功德。本乎無相。以無相智。契無相理。以爲
喜心。如空合空。不相妨礙。故云無相喜智。卽此無
相喜智。起行長養。永永無失。不敢怠惰。故云心心
生念。而靜照樂心緣一切法者。此二句義結前謂
此喜心。旣以無相。常生於念。是則在在利生。不妨
常靜常照。卽以靜照不二之樂心緣一切已得法
樂。未得法樂之諸眾生。令其同證無相喜中寂然
大樂無合之道。是爲佛子喜心體用之觀照也。

○十釋頂心位

卷四經直釋卷上之二

三二

179

若佛子。是人最上智。滅無我輪。見疑身。一切瞋等。如
頂觀。連觀連如頂。法界中因果。如如一道。最勝上如
頂。如人頂。非非身見。六十二見。五陰生滅。神我主人。
動轉屈伸。無受無行。可捉縛者。是人爾時入內空。值
道。心心眾生。不見緣。不見非緣。住頂三昧。寂滅定。發
行。趣道性實。我人常見。入倒生緣。不二法門。不受八
難。幻化果。畢竟不受。惟一眾生。去來坐立。修行滅罪。
除十惡。生十善。入道正人。正智。正行。菩薩達觀現前。
不受六道果。必不退佛種性中生。生入佛家。不離正

卷四經直釋卷上之二

三二

180

信。上十天光品廣說。

此釋頂心之義。卽智波羅蜜也。別經名灌頂住。謂觀空無相。得無生心。法水灌頂。故是人最上智。至可捉縛者一節。正明菩薩頂心上智體用。觀行破惑義也。若佛子是人最上智者。先舉能滅之智。謂此十住菩薩智。超前九位觀智。故云最上智也。滅無我輪等者。次舉所滅惑相。顯能滅智用也。滅者除也。無者空也。我卽我見。凡見皆緣我起。故從我滅而無之也。輪卽車輪。具有二義。一者法輪。謂佛

法苑珠林卷之三十一

六

181

法苑珠林卷之三十一

二

菩薩轉此法輪於眾生心海中。摧輾一切煩惱無明。令盡無餘。得成佛故。一者眾生我輪。因執我故。起貪瞋癡殺盜姪等諸惡業輪。流轉三界。無休息故。菩薩因修頂心智定。破除我相。將三界十使等煩惱輪去。故云滅無我輪。見等見身卽五利使之。一疑瞋卽五鈍使之。二一切等者。該餘惑也。如頂觀連觀連如頂。此二句者。卽智觀察連絡無間。因諸眾生我慢山高。非以高大智慧觀照不能破除。故以頂心妙智作觀而起觀照。以此智觀相續不

182

斷始能超出我慢山輪。方得明見四聖六凡十法
界中因果。皆如如一道也。是故此智爲最上最勝
頂智。首出庶物。如頂之象。如山之有頂也。如人頂
者。人身唯頂最尊。喻此菩薩頂心觀智高顯而無
上也。非非身見。至可捉縛者。此申所破之惑。非非
二字貫下。前一非字。是能遣之觀智。後一非字。乃
所遣之惑業。言非外道身見。可捉可縛。亦非六十
二種斷常邪見。可捉可縛。亦非五蘊妄身妄心和
合因緣。可捉可縛。亦非神我主諦。動轉屈伸。種種

此問至直降卷七之二

上二

183

計量。種種幻相。可捉可縛。何以故。如是諸見。皆有
受有行。可捉可縛。云捉縛者。卽執著義。謂凡有執
著。俱屬生死。不能解脫。菩薩以是頂心智觀。超出
一切情見。如太虛空。無有邊表。今盡諸見。是則無
受無行。無可捉縛者矣。是人爾時。至寂滅定一節。
乃明菩薩頂心寂定體用觀行。破惑證真之義。言
是人者。卽當位之人也。爾時二字。卽當入觀之時。
謂菩薩人當爾最上頂心智照而入觀行。觀外之
時。空卻諸塵世界。因果一道。觀內之時。空卻五蘊

乃系系元角角 二之二

上二

184

身心內外空時。當值空道。一切妄想顛倒。永不復
行。心心平等智以度眾生。而爲進修之念。故云心
心眾生。然雖度生爲念。而不見有能緣之心。所緣
之境。能緣所緣二性空故。是則終日度生。無生可
度。終日說法。無法可說。不但無能所緣度生之相。
亦無非能所緣理智之相。故云不見緣。不見非緣。
以是心境雙泯。智理全空。爾時倏然安住最勝頂
心三昧寂滅正定。故云住頂三昧寂滅定也。發行
趣道性實至正智正行一節。申明頂心智定。破惑

卷之三

三

證眞起智利生之義。謂此智定不同二乘住於空
智寂定不肯前進以饒益眾生。菩薩雖住智定而
不貪著。故從此正定中。發起慈悲喜捨廣大之心。
修行妙行。趨向佛道。是爲自利。以是所起之道。體
性眞實。不爲魔外所侵。而卽我人四相。入倒妄見。
生滅因緣。於此眞實不二法門。永無受行。滅盡無
餘。生滅因緣。既然無受無行。卽當入難幻化異熟
業果。卽亦畢竟不受其報。入難者。地獄。餓鬼。畜生。
邊地下賤。生不見佛。諸根不具。生長壽夭。世智辯

卷之三

三

聰之八難也。蓋此八難。無而忽有。有而忽無。幻化不實。菩薩覺破。故云八難幻化。果畢竟不受。所謂因窮而果喪也。唯一眾生等者。釋上心心眾生之義。謂此菩薩雖得解脫。不受輪迴。而卽思惟一切眾生。不知是幻。現前輪迴。是故示現去來坐立。於三界中。四威儀內。示作精進修行眾行。集福滅罪。種種方便。令諸眾生。除滅十惡。而生十善。使入佛道。爲佛法中正信之人。具足正智。而起正行。故也。所言正人等者。知因識果。滅惡生善。反邪皈正。卽

是正人。了達善惡體空。卽具正智。是以深明空而不空。有而不有。起行而修。卽正行也。如是所修。自利利他。卽入佛道。爲佛眞子。菩薩達觀現前。至不離正信一節。總結頂心智定現身益物之義。菩薩通達實相。觀無生於現前。雖然往返三界。不同凡夫。實非業繫。故永不受六道果報。亦卽不退於佛種性中生。佛種不退。卽生生世世。入佛法家。不離菩提正覺正信。如是智觀。是爲佛子頂心之體用。觀照也。上十天光品者。乃大部內。別品之中。更廣

說之。

○二明十行義二初標牒問辭 二正解其義

○初標牒問辭

盧舍那佛言。千佛諦聽。汝先問長養十心者。

此牒問誠聽許說十行修進地位觀行之義

○二正解其義十

○初釋慈心位

若佛子。常行慈心。生樂因已。於無我智中樂相應觀。

入法受想行識色等大法中。無生。無住。無滅。如幻。如

化。如如無二故。一切修行成法輪。化被一切。能生正信。不由魔教。亦能使一切眾生。得慈樂果。非實非善惡果。解空體性三昧。

此釋慈心之義。於四無量心中。卽慈無量行也。別

經名歡喜行。謂入法界。不爲邪動故也。常行慈心。

至得慈樂果一節。正明佛子慈無量心體用觀行

之義。前十住修十度爲被自利。以能自利後利人

也。此修十種利他法行。饒益眾生。又前十住位人

發心修行。卽以檀波羅蜜爲首。此十行人接物利

生。以慈爲本。是故常行慈心。慈有三種。一者有情緣慈。謂佛菩薩觀諸眾生。猶如赤子。運大慈心而弘濟之。令其皆得受安樂故。二者觀法緣慈。謂諸菩薩觀一切法。皆從因緣和合而生。了無自性。運大慈心以弘濟之。令其皆得受安樂故。三者無緣大慈。謂諸菩薩無心攀緣一切眾生。而於一切眾生。自然各各獲利益故。菩薩如是恆常修此三種慈心。使諸眾生獲離苦得樂之因。故云常行慈心。生樂因已於無我智中樂相應觀者。此正釋上三

種慈也。其無我智。卽根本智。於此智中。觀諸眾生。實無苦境。本來自樂。是故自樂樂他。皆以此智。是所謂相應也。入法受想行識色等大法中者。釋承樂相應義。入卽能入觀行。法卽所入觀法受想行。識卽心蘊法。菩薩入觀時。以觀五蘊身心四大法中。本無生住異滅法相。如幻如化。一切皆空。本來平等。以如如無二故。所謂照見五蘊皆空。度一切苦厄也。卽有情緣慈義。一切修行成法輪者。謂此菩薩。修行六度萬行。無非成就大法。自利利他。

故先修行種種妙行。成就無上法輪。用以自利。而
又化被一切眾生。能生正信。不繇外道邪魔所教。
既得正信。不受魔教。是獲離苦得樂之因也。卽法
緣慈義。亦能使一切眾生。得慈樂果。不但令得樂
因而已。亦能使諸眾生。乘此樂因。得至無上菩提
覺法之樂。無餘涅槃寂滅之樂果也。卽無緣慈義
非實非善惡果等者。結示觀體照用之義。所得慈
樂果者。非權小實法。亦非人天善惡有漏因果。是
何等果。是如如智所解。是如如理所空。空解之中。

體性平等之道。以此平等體性三昧。自樂樂人。如
是修慈。是真佛子慈無量心之體用觀行也。

○二釋悲心位

若佛子。以悲空空無相悲緣行道。自滅一切苦。於一
切眾生無量苦中生智。不殺生緣。不殺法緣。不著我
緣。故常行不殺不盜不婬。而一切眾生不惱發菩提
心者。於空見一切法如實相。種性行中。生道智心。於
六親六怨。親怨三品中。與上樂智。上怨緣中。九品得
樂果。空現時。自身他一切眾生。平等一樂。起大悲。

此釋悲心之義。卽悲無量行也。別經名饒益行。謂
常化眾生。使得法利。故以悲空空無相。至發菩提
心者一節。正明悲無量心體用觀行之義。卽有情
緣悲也。言以悲者。以大用也。上位慈能與樂。然而
眾生現在苦中。必須離苦。方能得樂。是故佛子。恆
用悲心。令諸眾生。離苦得樂。故云以悲也。其空空
無相者。上雖恆以悲心。實非愛見之悲。乃是空空
無相大悲。無能無所。無自無他。雖云空空無相。而
卽自然任運。以拔諸眾生苦。眾生苦爲所悲。菩薩

智爲能悲。緣所悲之緣。發起菩薩悲心。而行悲道。
故云悲緣行道。以是所行悲道。卽自滅一切苦。又
滅他一切苦。故於一切眾生無量苦中。生大悲智。
拔其眾苦。令得樂也。無量苦者。總卽凡夫二乘分
段變易。一生死苦。如是諸苦。起於三業。三業之中。
惟殺盜淫。三爲根本。以是因緣。業果相續。故得無
量苦也。二乘縱離分段。難免變易。菩薩今以無相
悲智。緣苦眾生。故不爲殺生之緣。不爲殺法之緣。
此二無緣。緣是菩薩。不著我相之緣。是故常行不

殺不盜不姪。而使一切眾生不惱。從此發菩提心也。此有三義。一者菩薩無殺盜姪。而諸眾生見之。心生歡喜。不能瞋惱。發菩提心。二者菩薩以永無殺盜姪。而教一切眾生。乃得漸漸受化。故使發菩提心。三者菩薩既謂無殺盜姪。而自他性眾生不生惱害。故俱發菩提心。如行願云。一切眾生而爲樹根。諸佛菩薩而爲花果。以大悲水澆益眾生。則能成就諸佛菩薩智慧花果。菩薩今以大悲緣苦眾生。不但不惱而已。而復恆與之樂。所謂怨親普

度悲心廣大。故曰一切眾生不惱發菩提心者也。於空見下。至九品得樂果一節。申明悲觀平等觀照之義。卽法緣悲也。上言一切眾生不惱使發菩提心者。是以菩薩能於真空實相理中。了見一切根塵諸法。皆如實相。本無眾生。本無煩惱。無一眾生不具實相。但以自迷而不覺悟。故於一切眾生種性行中。隨諸種類。發起大悲道智之心。爲諸眾生發明此義。令生道種智心。修行聖道。故於父母兄弟姊妹六親六怨親怨順逆三品之中。皆與最

上菩提樂智也。上怨緣中九品得樂果者。怨有上
中下三等。上有上中下。中下二等各三。三三合
爲九品。既於上怨三品緣中皆與上樂智者。其餘
中下六品。亦盡與之樂果。故曰九品得樂果也。空
現時下。結承悲觀平等之義。卽無緣悲也。菩薩今
令九品眾生俱得樂果者。乃緣無相真空觀照現
前之時。無論自身眷屬他身眷屬。一切眾生俱以
平等觀照一樂而起無緣大悲心。智拔一切苦而
與樂也。如是行悲。是名佛子。悲無量心之體用觀

行也。

○三釋喜心位

若佛子。悅喜無生心時。種性體相道智空空喜心不
著我所。出沒三世因果無集。一切有入空觀行成等
喜一切眾生。起空入道捨惡知識。求善知識。示我好
道。使諸眾生入佛法家法中。常起歡喜。入佛位中。復
是諸眾生入正信。捨邪見。背六道苦。故喜。

此釋喜心之義。卽喜無量行也。別經名無違逆行。
謂常修善法。謙下恭敬。故悅喜無生心時。至示我

好道一節。正明喜無量。心體用觀行之義。悅喜無
生心時者。悅以心言。喜以事言。佛子自喜得住如
實空中。而亦慶喜一切眾生。得住如實空中。以是
自他離苦得樂。其心暢快。此悅喜心。以從無相處
生。生即無生。無相可得。故云無生心也。種性體相
等者。種即種子。性即性分。體即本體。相即相狀。道
即中道智。即觀智。謂此菩薩以悅喜無生心。發生
一切智慧。觀察分別。十界依正種性體相。皆如實
相。即從如是種性體相理。發起道智。說法利生。應

以何法而得度者。即以何法而為彼說種種方便。
令離苦集而修道諦。證滅諦理。如是道智。無能無
所。心境空寂。空空喜心。不同凡夫。從憎愛諸境而
生其心。故不著我所也。雖然往返三界。出沒隱顯。
不同凡夫。和光混俗。而於三世因果等法。本來無
集。無有罣礙。但凡一切有所作為。皆入無相真空。
觀行。即此真空觀行成就。毋論親冤。皆以平等悅
喜。使人佛道。證佛道果。永離苦趣。所謂四弘誓願。
未離苦者。令離苦諦。未安道者。令安道諦。未得滅

者令證滅諦。故云觀行成。等喜一切眾生。此謂喜
心平等廣大。則成喜無量也。所言起空入道者。謂
卽起於所成空觀。修假觀行。趣入佛道。接物利生。
又不同二乘沈空滯寂。安住化城。不肯前進。故曰
起空入道。言此所入之道。非真知識。不能通達事
理。是故捨惡知識。而求善知識也。惡知識者。身居
邪見。斷佛慧命。故善知識者。知真本有。識妄元無。
故如此知識。求其指點。示我好道。言好道者。卽佛
道也。乃卽諸佛所證。眾生所迷。不生不滅。清淨覺

道菩薩善修此道以自利。卽以此道能使眾生入
佛法家法中而利他也。所言入佛法家者。卽生如
來家。不生外道邪見之家。入佛法中者。謂生如來
正法之中。不生權小法中也。以上明其體用。向下
結成喜觀之益。常起歡喜。入佛位中。此二句者。乃
結自利。復是諸眾生等者。乃結利他也。不惟自己
墮在佛數而生歡喜。又使一切眾生入於正信。捨
諸邪見。生生世世。背六道苦。所以菩薩常生平等
歡喜也。如是修喜。是名佛子喜無量心之體用。觀

行也。

○四釋捨心位

若佛子。常生捨心。無造無相空法中。如虛空。於善惡有見無見。罪福二中。平等一照。非人非我所心。而自他體性不可得。為大捨。及自身肉手足。男女國城。如幻如化。水流燈燄。一切捨而無生心。常修其捨。

此釋捨心之義。即捨無量行也。別經名無屈撓行。謂行大精進行。能令一切得至究竟涅槃。故常生捨心。至平等一照一節。正明捨無量心體用觀行。

光門經疏卷之二

三

之義。從初發心。歷無窮劫。而行濟度。故云常生捨心。無造即無能也。無相即無所也。謂此佛子。常生捨心之時。是乃生即無生。捨亦無捨。故曰無造無造則無有相。無相則空空即無物。以是無造無相空法之中。如虛空也。言空法中如虛空者。釋明常生捨心無造無相之義。上文既言常生捨心。是即有心可生。有法可捨。有造作。有形相。何以皆言無耶。蓋此真空實相法中。心境諸法。一切皆空。若立一塵。即墮限量。必也無造生心。無相行捨。是以頭

光門經疏卷之二

三

頭解脫法法無礙。故曰空法中如虛空。不拒諸象
發揮也。未發心人。於善事起有因果見。招福果相。
於惡事起撥無因果見。招罪業相。今佛子捨心既
如虛空。則於善惡二因。有無二見。罪福二報中。平
等一照。了然無二。皆與實相不相違背。故心如虛
空也。非人非我所心。至爲大捨一節。申明捨無量
心體用觀行之義。非人非我所心者。非者空也。所
心者執情也。以是妙智平等一照。是故人我二心。
內外執情。當下頓空。以是頓空自他體性俱如虛

空不可得故。如是之捨。是爲大捨。卽我空義。從此
心性俱空之處。以及身肉手足之內財寶。男女國
城之外財寶。菩薩觀之。總皆如幻如化。如水流。如
燈燄。虛假不實。故一切捨。卽法空義。如幻如化。喻
內外財物不可得也。如水流。如燈燄。喻自他體性
不可得也。而無生心。常修其捨。此二句義。總結佛
子無相捨心。以顯三觀圓修之義。無生心者。乃無
造無相。無生。無滅實相心也。卽空觀義。常修其捨
者。謂此佛子。雖然了知自他體性俱不可得。亦不

同小乘人。不起方便說法度生。正乃卽此無相心中常生方便修行捨心攝受有情。卽假觀義。二觀不立。卽中道義。所謂應無所住而生其心。如是修捨。是名佛子捨無量心之體用觀行也。

○五釋施心位

若佛子。能以施心被一切眾生。身施。口施。意施。財施。法施。教導一切眾生。內身。外身。國城男女。田宅。皆如如相。乃至無念財物。受者。施者。亦內亦外。無合無散。無心行化。達理達施。一切相現在行。

此釋施心之義。卽施攝法也。別經名無癡亂行。謂不爲無明所失亂故。能以施心至教導一切眾生一節。正明施心所攝體用觀行之義。言能以施心者。卽能被之教。被一切眾生者。卽所被之機。言身施者。以身擔荷。執身負役。乃至所捨頭目髓腦。身肉手足。口施者。口無雌黃。出言善熟。乃至歡喜讚歎。說誠實語。意施者。心無瞋恨。貪癡嫉妬。乃至常懷恭敬。現柔和相。財施者。國城妻子珍寶田園。乃至一切資生產業。法施者。權實方便大小諸乘。乃

至一切因緣譬喻是也。教導一切眾生者。上言被一切眾生。是何能被之法耶。謂以身。口。意三輪妙用。財法二種被諸眾生。隨所樂求。令得如意。教引開導。攝受一切眾生。使其解脫。永離苦趣故。內身外身。至達理達施一節。申明施心所攝體用觀行之義。內身。卽內五蘊身命。外身。卽外國土眷屬資具也。菩薩教導之中。雖以權智施心。種種施與。而必以實智照理。了無施相。反觀內身外身。國城男女田宅等物。當體全空。皆如如相。實無有法可施。

不但無財物施相。乃至無念財物之念。心境空也。無受者之人。無施者之我。能所泯也。亦無內之身命。亦無外之財物。以緣生如幻。無有合相。緣滅如幻。無有散相。故所以施受內外合散之間。實無施心可起。無施行可作。無眾生可化。不妨終日度生。無生可度。終日說法。無法可說。故云無心行化。此上明空觀。下明假觀。達理深達施理。卽達三輪體空。達施深達施法。因人而用。求財施財。求法施法。二皆不謬。故一切相現在行者。此總結明三觀圓

修之義。謂雖無心行化。而起化導。不妨修卽無修。
無修中修。化卽無化。無化中化。不墮斷常。不著空
有。以此施道。歷歷明明。達理達施。一切諸相。現在
前行。如是行施。方是佛子。施心體用。攝受眾生之
觀行也。

○六釋好語心位

若佛子。入體性愛語三昧。第一義諦法語義。一切實
語言。皆順一語。調和一切眾生心。無瞋無諍。一切法
空智無緣。常生愛心。行順佛意。亦順一切他人。以聖

七開五三字家二二二

三二

213

法語教諸眾生。常行如心。發起善根。

此釋好語心之義。卽愛語攝也。別經名善現行。謂
生生常於佛國土中生故。入體性愛語三昧。至皆
順一語一節。正明愛語心所攝體用。觀行之義。愛
語攝者。乃是至慈至悲。親親切切。叮嚀教誡。和順
語也。亦名好語心攝。好語攝者。卽是善好柔軟語
也。謂此語言。非凡小情見偏執之語。乃卽依如來
體性愛語三昧。正定之所生故。如來有五語。一真
語。二實語。三如語。四不誑語。五不異語。今文具三。

佛剎經正覺卷上之二

三二

214

以該中二第一義諦法語義者。是爲眞語。卽以大
乘中道了義之談。不將不了義語爲眾生說。故云
第一義諦法語義也。一切實語言者。是爲實語。不
誑語也。皆順一語者。是爲如語。不異語也。謂此佛
子。旣以第一義諦而生語言。故凡發言吐語。無不
眞實。而又事理明了。皆順第一義諦之語。如是五
語爲因。當感如來果舌之相。經云。出廣長舌。徧覆
三千大千世界。說誠實言。是也。調和一切眾生心。
至亦順一切他人一節。申明愛語體用之義。調和。

卽上諸語爲能調。眾生心爲所調。無瞋卽心和。無
諍卽言和。一切眾生固多。佛子以諸好語調之。亦
皆心氣平和。凡有言出。自無所諍。何者菩薩了達
一切諸法皆空。智亦無緣。如空谷之答響。所以不
起佛見。不與佛諍。不起法見。不與法諍。不起眾生
見。不與眾生諍。是則一切諸法皆空。智亦無緣。雖
則舉無能所緣相。不妨恆與一切眾生自然任運。
常生慈愛之心。如保赤子。使得安隱。故云一切法
空。智無緣。常生愛心。此其所以能調和眾生心而

無瞋無諍也。行順佛意者。卽以愛心上合十方諸佛。同一慈力。亦順一切他人者。卽以愛心下合一切眾生。同一悲仰。所謂無緣慈力。赴羣機。明月影臨于澗水也。以聖法語等者。結顯佛子愛語之用。謂此愛語。乃依如來聖教法語。種種方便。隨機設化。使諸眾生常行如心。亦從如如心中發起善根。本以自調。而亦調和一切眾生。如是愛語。方是佛子好語。心攝受眾生之體用觀行也。

○七釋利益心位

佛子利益心位

三

若佛子。利益心時。以實智體性。廣行智道。集一切明。欲法門。集觀行七財。前人得利益故。受身命而入利益三昧。現一切身。一切口。一切意。而震動大世界。一切所爲所作。他人入法種空種道種中。得益得樂。現形六道。無量苦惱之事。不以爲患。但益人爲利。

此釋利益心之義。卽利行攝也。別經名無著行。謂於我我所。一切皆空故。利益心時。至震動大世界一節。正明利益心攝體用觀行之義。實智體性。卽自證之本智。廣行智道。卽利生之權智。若乃佛子。

佛子利益心位

三

欲行利益心時。必依實智體性。方能廣行智道之
權智也。集一切明燄法門等者。緊承廣行智道而
言。明燄法門。卽是種種智慧因緣譬喻。無量方便
法門。所謂開方便門。示真實相也。集觀行七財者。
觀行卽空假中之單複。圓二十五輪觀行法也。七
財卽七聖財。謂信戒聞捨慧慚愧七事。此七事中。
戒攝進慧攝定。此上卽能被之教。前人等者。卽所
益之生也。菩薩聚集此教法門。爲使前人洞曉資
藉。識路還家。無乏中途。得至涅槃彼岸之利益故。

言受身命而入利益等者。此申明利行攝之義。諸
佛菩薩。教化眾生。必然隱聖現劣。和光同塵。以同
眾生身相事業。如影隨形。久化方皈。使其解脫。是
故假受四大幻身。假受五蘊形命。而入利益三昧。
此卽三昧覺法正受意生身也。如他經云。初地菩
薩方得。此經七行便具。此是圓頓法門。故能現一
切身。現一切口。現一切意之三輪也。三輪以身爲
神通輪。欲說法時。必先現通驚動眾生機情。令發
正信。然後說故。以口爲教誡輪。若說正法。先以方

便開示引導。令諸眾生。反邪皈正。改惡從善。然後說故。以意爲記心輪。如說法時。必先以意鑑諸眾生。根器利鈍。然後說故。而震動大世界者。震乃六種震動。卽動起涌震。吼擊是。大世界者。化境有大中小三千。此舉大千該中小故。言此佛子。饒益眾生。現身口意神通妙用。說諸法門。使未發心者。令其發心。已發心者。令其增長。繇此三輪業用。故感大千世界六反震動也。一切所爲所作。至但益人爲利一節。此申明利益心體用之義。法種卽聖教

法種。空種卽真空理種。道種卽道種性種。菩薩一切所爲所作。無不欲令一切他人發菩提心。起大乘信。而入如來聖教法種。繇法資熏解。二空理。而入真空理種。繇解空理。起行修行。所修善根。皆如實際。而入金剛道種性種之中。得是法益。永離苦趣。證十地果。得是法樂故也。現形六道等者。上言現一切身口意。不知此形於何處現。謂卽於六道之中現也。以六道中有種種苦。如天有五衰相現等苦。人間有生老病死等苦。修羅有瞋心鬪爭等

苦。地獄有寒酸楚痛等苦。鬼神有沈幽愁等苦。鳥獸有懷獠狘等苦。菩薩雖於六道眾生之中。隨類現形。而於無量苦惱之事。不以爲患。下結所以眾苦不避者。但專饒益法界中人爲利耳。智道所行。智體且空。眾生雖化。生性無生。如是之行。方是佛子。利益心攝受眾生之體用觀行也。

○八釋同心位

若佛子。以道性智。同空無生法中。以無我智。同生無二。空同源境。諸法如相。常生常住常滅。世法相續流

轉無量。而能現無量形。身色心等業。入諸六道。一切事。同。空。同。無。生。我。同。無。物。而。分。身。散。形。故。入。同。法。三昧。

此釋同心之義。卽同事攝也。別經名難得行。謂成就難得善根故。以道性智。至同生無二一節。正明同心體用觀行之義。以道性智者。卽菩提道性。利生之權智也。此智契同真空。無生無滅。無相法中。智理無二。圓融一切。故以無我無人之智現身。同生無二。無我智者。卽根本智。此智卽無差別故。依

此智體。乃能同生無二。同。卽能同。生。卽所同。言無
二者。其義有二。一者。以物我無二相。隱同一類。種
種方便。種種神通。攝受眾生。無彼此故。二者。以物
我無二體。生。卽無生。同。卽無同。皆同於無生空。是
故同生。體無殊故。空同源境。至一切事同一節。申
明同心體用之義。空同源境者。承上。旣云同生。何
名無二。旣是無二。又何同生。言同生無二者。蓋謂
生我皆本同於無生空理。如一切水。皆同本源。一
切根境。皆同真境。以是無二真空理境之中。實無

永門聖旨降家上之二

三二

225

人我同異之相。故云空同源境。諸法如相。旣一切
法。皆如實相。何有生住滅相。本自無生。無住。無滅。
無生。卽無不生。無住。卽無不住。無滅。卽無不滅。以
無生住滅故。所以常生常住常滅也。世法等者。辯
明無生無滅之義。問曰。旣云常生常住常滅。云何
又有生住滅相之遷流耶。答曰。繇是眾生。不識常
生常住常滅之法。迷真逐妄。起惑造業。隨業受報。
輪轉三世。生死無窮。故云世法相續流轉無量。菩
薩因觀世間眾生。隨業受報。受無量苦。不自覺知。

卷之系系口角卷 二之二

三二

226

故以同體悲智起同事攝而能示現無量形身色
心等業。入諸六道一切事同應以何身得度者。卽
現何身。與諸眾生共處一處種種方便而爲說法。
令得解脫。如普門大士。隨機赴感隨類現形。故云
入諸六道一切事同也。空同無生等者。此總結顯
同心體用之義。空同無生一句結上。同空無生法
中之意。謂乃空無二空。唯一真空。以是無二真空。
故能現一切空。其所現一切空皆同於無生空。故
云空同無生。我同無物一句結上。以無我智。同生

無二之義。謂乃我本無我是。故物卽無物。無我無
物。故能物物現形。以我同無而無物也。而分身散
形。故入同法三昧者。此二句義結上。能現無量形
身色心等業之文。謂得此三昧者。方能入諸佛土。
現諸眾生身相同。諸眾生事業因事彰名。故名同
法三昧。如是智定。是爲佛子同事心攝受眾生之
體用觀行也。

○九釋定心位

若佛子。復從定心觀慧證空。心心靜緣於我所法。識

界色界中。而不動轉。逆順出沒。故常入百三昧。十禪支。以一念智。作是見。一切我人若內若外。眾生種子。皆無合散。集成起作。而不可得。

此釋定心之義。卽勝定行也。別經名善法行。謂說法授人。爲成佛軌則。故復從定心。至十禪支一節。正明定心體用。觀行之義。復從定心者。復。又也。謂前於欲界中所入三昧正定。今又復從欲界定心而起。入上二界現身益物。故也。觀者觀察。慧者慧照。觀慧卽能證智空。卽所證理。謂此菩薩以寂定

觀慧心。而證定中空理。其所證空。不同二乘寂滅。解脫。不能觀照根身器界。無明種子。當體全空。菩薩是以證空。而不住著空理。能於真空理中。心心靜緣。於我所法。皆悉如幻。隨如幻境。現如幻身。於色界識界中。爲說如幻法門。廣化如幻眾生。雖然。如是不爲色識二界所能動轉。不被物轉。能轉物也。識界卽四空天。色界卽四禪天。所云不動轉者。謂於上二界中。若逆出。若順出。若逆沒。若順沒。以是出入隱顯。故常入百三昧。十禪支法。種種神通。

自在無礙。不爲下界欲惡所染。亦不爲上二界空
禪所拘。所謂逆行順行。天莫測也。華嚴經云。童子
身中入正定。童女身中從定起。童女身中入正定。
童子身中從定起等是也。三昧名有無量。略則百
八。今舉百三昧。破三界眾生百法相生見故。十禪
支者。一覺。二觀。三喜。四樂。五一心。六淨。七捨。八念。
九慧。十不苦不樂。此十乃是禪天之定支也。以一
念智至而不可得一節。申明定心觀慧體用。心心
靜緣之義。以一念智。作是見者。卽視定中一念無

凝清淨。智慧圓照。如實了見。一切我人若內根身。
若外器界。眾生異熟業識。無明種了。皆無合散。無
集無成。無起無作。一切皆空。俱如幻化了。不可得。
所謂世界本無成住壞空。眾生本無生住異滅。如
是觀者。是名菩薩定心出入體用之觀行也。問此
行位定心。觀智破惑。與前住位。有何差別。答大略
相似。各有淺深不同。前住位定破分別之麤惑。此
行位定破分別之細惑。故不同耳。

○十釋慧心位

若佛子。作慧見心。觀諸邪見結患等縛。無決定體性。順忍空同故。非陰非界。非入非眾生。非一我非因果。非三世法。慧性起光光一燄。明明見虛無受其慧方便。生長養心是心。入起空空道發無生心。上千海眼王品。已說心百法明門。

此釋慧心之義。卽勝慧行也。別經名眞實行。謂二諦非如。亦非非相故。作慧見心。至三世法一節。正明慧心體用觀行之義。作慧見心。卽能照之觀智。觀諸邪見等者。卽所破之惑也。作者用也。謂此菩

薩大用。依本所解寂滅理慧而起觀照。照見自他安心。及審觀察無明所起諸惡邪見結患等縛。如實了知。無決定體性也。諸邪見者。卽諸外道執常執斷執一執異。種種執著等見。言結患等縛者。結謂眼與色結等。患謂眼色等結使。起諸業患。致使生死纏縛。不得解脫。故云結患等縛。無決定體性等者。謂此等患繇迷藏識現起。至七地後。修道無間。順忍解脫。藏識一空。轉成無生法忍。此等諸患於彼順忍。同時寂滅。故云無決定體性。順忍空同

也。所以觀五陰。非五陰。觀十八界。非十八界。觀十二入。非十二入。觀眾生。非眾生。觀一我。非一我。觀因果。非因果。觀三世法。非三世法。一切皆非。本如來藏妙真如性。所謂性真常中。求於去來。迷悟生死。了無所得。故非五陰等諸法也。慧性起至發無生一節。乃結慧心觀照功能。以顯不住假觀而證入中道觀也。慧性起者。繇是無作妙慧。見心所起。逾發觀慧妙用。故云慧性起也。言光光一燄者。光光卽智。一燄卽慧。智能照境。慧能了境。以智慧燄。

了緣境空幻也。明明見者。了了照見之義。虛無受者。言此慧照體性。無障無礙。虛徹靈通。不受諸受。故名虛無受。其慧方便等者。謂此佛子。以般若智照了見無明體空。是故心體虛通無礙。繇虛通無礙。故其慧益以種種巧妙。無量方便。長養法身。成就慧命。不繇他悟爲成就。故是心入起空空道。發無生心。如苗增長也。是心卽本慧心。入卽證入。起卽發起。空空卽是所證人法。一空真理。道卽中道。蓋以從前已來所用慧心。至此已證二空。不惟五

蘊等法爲空亦無能空五蘊等法。於二空理亦無所任。以無住故。迴向一乘中道法界海中發無生心。任駕慈航故也。無生心者。以不見有毫法生滅故曰無生心。惟發此心。普載普運。同證金剛不壞心故。如是悲智雙運。是爲佛子慧心體用之觀行也。此是略說。於大部內。上干海眼王品中已說此十心百法明門。一一廣明。不可思議言百法明門者。卽百八智慧門。今言百者舉大數也。菩薩將離兜率宣說此法。畱與諸天以作憶念。然後下生亦

佛說梵網經直解卷上之二

三

237

是初地所證化導法門也。

佛說梵網經直解卷上之二

三

佛說梵網經直解卷上之二 終



238